

# 1 Corintios

---

**Pablo ishim Porrosht aabo ör saludo.**

**1** <sup>1</sup>Yok Pablo. Porrosht chiihla yok par tomsaha par yok Jesucristo ir apóstol shi pork sahmür chiihla yok shuu itsorz. Eyok leshibich de pahir iich otsii Sóstenes. <sup>2</sup>Tichew ana hutita par tokosim olak uje olak Porrosht aabo uje ebuhulo ese dit Corinto. Porrosht chiihla olak par ir aabo pork Jesucristo ishi olak hnitewihi Porrosht ahirkite. Chiihla olak par uje ye ahakörlo uje ich mihnüwo itso uje chiihla erze yewo uje ode lekityo uje ye olotiis eyok Irhích Jesucristope. Wichí wir ör Irhích hn eyok Irhích toy. <sup>3</sup>Sehe tuu Porrosht uu eyok Deych hn eyok Irhích Jesucristo odosir olak hn oduhu olak aho kiis.

**Cristo sosir ör.**

<sup>4</sup>Sehe titim olak uje shish tikina Porrosht par olak pork Porrosht sosir olakni pork ye otiislo Jesucristope. <sup>5</sup>Porrosht shuu olak ikirít ihírtpa uje olak de nāhu irmo pork wichí shuu olak dituwo par animirāhalo ir ahwoso hn shuu olak dituwo par nos erahalo uje ich ūru <sup>6</sup>pork uje oyitim olak Cristoni ich ahmürlo heke amsahalo par Porrosht aabo. Erze om uje yesh ahakörlo ich shuu imeheeych uje olak Porrosht aabo. <sup>7</sup>Porrosht nos shuu olak dituwo par uje ahakörlo ir ibiyo uje ehn yesh anemlo ese deeych uje eyok Irhích Jesucristo cheeshpo nehe. <sup>8</sup>Eyok Irhích Jesucristo wichí uje tibey olak nehech terihi uhurc, hn ese deeych uje etírlo ire ahir nehe ich ye olak hnitew chihí Porrosht ahirpe. <sup>9</sup>Porrosht shish shuu yakaha uje ire tata. Wichí uje chiihla olak par uje wichí olak ihyérak ir ijít Jesucristo uu eyok Irhích.

**Ye ompe otsehek ire.**

<sup>10</sup>Pishibo watsaklo, titim olak. Eyok Irhích sahmür uje olak eyuwo itsye pork ye ompe uje ahakosloye hn uhu olak kāra. Shi tyenij nos akishlo olak eyuwo par uje nos olak pwele ahakörlo kuche. <sup>11</sup>Pishibo watsaklo, shi titim olak ahnūwo pork Cloé ir iiso otatim yok uje shish ahakosloye. <sup>12</sup>Titim olak uje ahakosloye pork olak yewo ode uje otata

otsii: —Oyahmūr Pablo,— hn yewo otsii: —Oyahmūr Apolos,— hn yewo otsii: —Oyahmūr Pedro,— hn yewo otsii: —Oyahmūr Cristo.— <sup>13</sup>Eyok uje eyok Porrosht aabo ich eyok itso Cristo ir yūhurrza. ¿Je olak yeēk dehek Cristo ir yūhurrza duhu pikaabo? Ye odehekpe. ¿Je odowish Pabloni odibite krus eeych par uje ishi olak hnitew? Ye odowishpe. ¿Je uhu otohirm olak onāra Pablo iich? Ye onārape. <sup>14</sup>Tikinship Porrosht uje ye tokohirm olak yeēk petikni. Shi tokohirm Crispo hn Gayo, <sup>15</sup>heke nīhyok uje yeēk tata uje otohirm olak yeēk ochīra piich. <sup>16</sup>Shi tokohirm Estēfanas hn nos wir ir iiso per ich tikey kimiji yewo ochihi uje tokohirm ōrni. <sup>17</sup>Cristo ye duhu tikirēt petikni par tokohirm oso. Shi shuu tikirēt par tanimīrāha ir ahwoso titim oso uje ire ishi ōr hnitewihi Porrosht ahir. Titim ōr tīra ahwoso uje ochiraha, ye tīra ahwoso uje ye odirehepe. Kimiji titim ōr tīra ahwoso kināho ich ye odirehepe uje Cristo tooho krus eeych heke tokole itso uje ye Cristo ukūrbirsh par shuu omasaha par Porrosht aabo.

### Porrosht ukurbo de Cristo.

<sup>18</sup>Sehe titim olak uje nos wir oso uje tyenij otār urhuta bahluta ehēt nehe otata erze ahwoso uje Cristo tooho krus eeychkite otsii: —Ye jukur.— Mahn par eyok uje eyok owich de Porrosht ahir ich bale uje Cristo tooho krus eeych hn Porrosht ukurbo shuu yomsaha par ir aabo. <sup>19</sup>Porrosht ahwoso tata shuu itsorz im: —Porrosht sole: “Erze oso uje ye ōr paabope uje ōr eykdeyo ich tuu ōr eyuwo ye jukur, hn erze uje ich ōr dītuwo tuu ye ōr ībiyo jukur.”— <sup>20</sup>Erze uje ich ōr eykdeyoho nāhu īrmo ishujāro hn erze uje ochichew ōr hute hn erze uje ochiraha ochiilehet ¿latik tokolihi ōr? Porrosht shuu ōr eyuwo shi itso uje ōr totihlo. <sup>21</sup>Nos wir oso uje ich ōr eykdeyo shi otsērza kuche uje de nāhu īrmo per Porrosht ye duhu odiraha irpe. Porrosht ich eykdeyo. Shuu yanimīrāha lahwoso yitim ōr uje Cristo tooho krus eeych par ishi ōr hnitewihi Porrosht ahir per ochibite uje ich ye jukur uje Cristo shiyokōr, per Porrosht shuu nos omasaha par ir aabo erze uje ye olotiis Cristope. <sup>22</sup>Nos wir israel oso otsapur yarta uje ye latik pwele niyokōr par uje oteychim par uje ye olotiis Cristope, hn erze griego sehe otēr wir ahwoso uje ōr eykdeyo otata par uje ye olotiis, <sup>23</sup>per ōryok shi oyanimīrāha uje Cristo tooho krus eeychkite par uje ishi ōr hnitewihi Porrosht ahir. Erze israel oso otsotiis erze ahwoso heke ōryok ahwoso ich shi itso uje kojach shuu ōr hnite hn shuu ōr kay, hn erze oso uje ye ōr israel yewope wir ochibite uje erze ōryok ahwoso ich shi itso totihlo ōr ahwoso. <sup>24</sup>Per eyok uje Porrosht chiihla eyok kimiji eyok israel oso o kimiji eyok dihipo kināho, par eyok erze uje Cristo shiyokōr ich shuu imeheeych uje Porrosht ukurbo deyo de hn ich ir eykdeyo. <sup>25</sup>Oso ode uje otata uje Porrosht ye eyuwirsh per ir eyuwo ich ma deyo je nos wir oso, hn ochibite uje ye ir ukūrbirsh per Porrosht ich ma ukurbo deyo de je nos wir oso.

<sup>26</sup>Pishibo watsaklo, uhu olak eyuwo tisir uje Porrosht chiihla olak par olak ir aabo. Ye olak kihniyape uje oso otata hn ochibite uje olak eykdeyo, hn olak arhaabo uje or bahluwoho irmo, hn olak arhaabo uje or ihir deyo or aabo. <sup>27</sup>Erze uje ich or eykdeyo ochibite uje ye jukur uje Cristo tooho krus eeych per Porrosht chiihla erze oso uje yewo otata uje ye or eyuwirsh par uje shuu wir opook erze uje or eykdeyo, hn erze uje or ukurbo deyo de otata uje Cristo tooho krus eeych pork ich ye ir ukurbirsh per Porrosht chiihla oso uje ye or ukurbirsh par ir aabo par shuu wir opook erze uje or ukurbo deyo de. <sup>28</sup>Erze oso uje yewo ochibite uje wir ye or jukur wir uje Porrosht chiihla or par ir aabo, hn erze oso uje yewo ye onahmur orpe wir uje Porrosht chiihla or. Porrosht chiihla or shuu itsorz par uje shuu erze yewo or eyuwo ye jukur, <sup>29</sup>heke ich nihyok yeek pwele narim irehe Porrosht ile ikich. <sup>30</sup>Porrosht wichi uje ishim eyok ikirit pork ye yotiis Jesucristope. Shi Cristo wichi uje shuu eyok eykdeyo. Wichi uje shuu eyok Porrosht aabo, hn shish shuu eyok iluu ma om, hn ishi eyok hnitewihi Porrosht ahir, <sup>31</sup>heke Porrosht ahwoso tata shuu itsorz im: —Uje sehe yeek narim ire o narim oso yewo ich ye ompe. Tyenij shi narim eyok irhich.—

#### **Cristo tooho krus eeych par or ire.**

**2** <sup>1</sup>Pishibo watsaklo, uje takaachihni olak ahirni hn tanimiraha Porrosht ahwoso titim olak uje Porrosht shuu Cristo shiyokor par olak, ich teet ahwoso uje imeheeych par erahalo hn ye titim olakpe uje tara peyuwo uje ich kwesupa erahalo, <sup>2</sup>pork tibite uje shi sehe titim olak Jesucristo uje tooho krus eeychkite. <sup>3</sup>Uje takaha tekirihni olakni ich yok kasik uje tanimiraha Porrosht ahwoso titim olak. Tikitila or nehech pikiyo tara. <sup>4</sup>Uje tiipuhut tanimiraha Porrosht ahwoso ich tuu amsahalo par Porrosht aabo. Ye titim olak ahwoso uje ich ye imeheeychpe itso uje oso otata uje or eykdeyo per Porrosht Ichibich hn Porrosht ir ukurbo wir uje shuu imeheeych uje pahwoso ich uru. <sup>5</sup>Heke olak ye otiislo Porroshtpe ye uje shi oso otatim olak. Ye otiislo pork erahalo uje Porrosht ukurbo de. Wichi shuu erahalo erze uje ich uru.

#### **Porrosht Ichibich shiyokoraha or.**

<sup>6</sup>Sehe titim olak uje oryok de Porrosht aabo or ahir uje ma ochiraha Porrosht ahwoso ich oiyokoraha or ir ahwoso uje ich ma kwesupa par ochiraha. Erze ahwoso uje erze or eykdeyo oshiyokoraha erze oso uje ode nahu irmo uje ye odiraha Porroshtpe ich ye oiyokoraha olakpe oyuhu oryok ilo or, hnii erze or ahwoso uje or bahluwo oshiyokoraha or pork deeych yet nehe ich or ahwoso tokole uje ye jukur. <sup>7</sup>Per oryok oyiita erze ahwoso uje antkite Porrosht ye duhu imeheeychpe. Ye duhu oso odiraha lahwospe. Porrosht ich eykdeyo. Uje ehn yahpaa niyokor irmokite ichii

chibite lahwoso uje oso tyenij ye olotiis Cristo par omasaha par ir aabo par uje otaachihî ire ahîr nehe. <sup>8</sup>Nos wir oso òr bahuwo ye odirehepe uje Cristo tyenij tooho òr. Kimiji odiraha ich ye odowishihî eyok írhihich uje târa poõrc krus eeych <sup>9</sup>pork Porrosht ahwoso tata shuu itsorz im: — Porrosht shiyokõr kuche par erze uje otsahmûr ire per nîhyok yeëk uje umo erze kuche, hnii chunt latikpo erze kuche, hnii shuu deyuwo tisîr erze kuche.— <sup>10</sup>Per eyok uje eyok Porrosht aabo Porrosht shuu Dechibich shiyokorâha eyok erze kuche. Porrosht Ichibich nos chiraha Porrosht ir iluu uje ich kwestpa par oso ochiraha. <sup>11</sup>¿Yeëkpo uje nos chiraha hnakirbich ir eyuwo? Shi ese hnakirbich ir ichibich uje de ire eheth wichi uje chiraha. Shi itspo nîhyok yeëk uje chiraha Porrosht ir eyuwo. Shi ir Ichibich wichi uje nos chiraha Porrosht ir eyuwo. <sup>12</sup>Porrosht ye dosim eyok erze iluu mîhnûpe uje de nâhu îrmo per ishîm eyok Dechibich par uje shuu yiraha erze kuche uje ishîmihî eyok. <sup>13</sup>Wir uje oiyiyokorâha olak. Ye oiyiyokorâha olakpe erze uje târa oso òr eyuwo. Shi oiyiyokorâha olak erze uje târa Porrosht Ichibich oyuhu imeheeych par erze uje Porrosht Ichibich de òr aho. <sup>14</sup>Ese uje ye Porrosht Ichibich chihî ire ehethpe ich ye nahmûr erze kuche uje târa Porrosht pork ire chibite uje erze kuche uje târa Porrosht ich ye jukur. Ye ir pwelpe uje chiraha pork shi pwele chiraha uje Porrosht Ichibich shiyokorâha ire. <sup>15</sup>Ese uje Porrosht Ichibich de ire eheth hn shiyokõr uje tata ich shuu deyuwo tisîr nos wir kuche kimiji om o kimiji mîhnik. Per ese uje ye diraha Porroshtpe ye diraha uje Porrosht aabo oshiyokõr heke ye pwele tata kimiji om o kimiji mîhnik. <sup>16</sup>Porrosht ahwoso tata shuu itsorz im: —¿Yeëkpo chiraha eyok írhihich ir eyuwo par uje shiyokorâha ire?— Nîhyok, per Cristo ir eyuwo de eyok.

### Porrosht îya Pablo uje shiyokõr ir ibiyo.

**3** <sup>1</sup>Pishîbo watsaklo, uje tikitkêr Porrosht aabo yewo uje oshiyokõr uje ire sahmûr ich titim òr erze Porrosht ahwoso ir iluu uje ich kwestpa ochiraha, per ye yok pwele tuu itsorz uje tikitkêr olak. Shi tikitkêr olak tuu itso erze Porrosht aabo uje otsahmûr nâhu îrmo oso òr iluu. Shi tikitkêr olak tuu itso erze uje hnii omasaha par Porrosht aabo pork olak shi olak itso pikîhnino uje hnii oshûrha. <sup>2</sup>Wapni tiyokorâha olak Porrosht ahwoso uje ye kwestpe par erahalo. Wir shi itso leshe uje pikîhnint ihi ehn yahpaa pwele taakpe. Nehech ele ahle yesh olak itso pikîhnint uje ye òr pwele taakpe <sup>3</sup>pork yesh ahmûrlo olak iluu iler. Yesh de olak uje abitilo kuche hn ahakosloye heke imeheeych uje yesh ahmûrlo olak iluu iler hn ahakõrlo uhu olak itso erze uje ye odiraha Porrosht iluutpe <sup>4</sup>pork olak eheth yeëk de uje tata im: —Tahmûr Pablo,— hn yet de uje tata im: —Tahmûr Apolos.— Heke yesh ahakõrlo uhu olak itso erze uje ye Porrosht aabope.

<sup>5</sup>Erahalo Apolos ir ibiyo, hn erahalo Pablo ir ibiyo. Wir shi Porrosht ir ibiyo. Wir uje ye oduhu otiislo Porroshtpe. Nos wir eyok yiyokõrlo erze

obiyo uje eyok İrhĩch ishĩm eyok nohmĩr nohmĩr. <sup>6</sup>Shi yok itso yeẽk uje chukwẽr jõro, hn Apolos wichi shi itso yeẽk uje sita, per Porrosht wichi uje shuu erze jõro krese. <sup>7</sup>Heke shi Porrosht wichi uje bale pork shuu krese, ye esepe uje chukwẽr hn ye esepe uje sita. <sup>8</sup>Ese uje chukwẽr hn ese uje sita ich õr ibiyo ihĩrtso shi itsye. Porrosht wichi uje ishi õr uje otserz per shi par erze õr ibiyo uje ich om. <sup>9</sup>Õryok oyukwĩya Porrosht uje oyiyokõr ir ibiyo. Wichi uje takashĩm õryok shuu tokole om. Olak shi olak itso Porrosht ir shakĩrrza. Uje oyitĩm olak Porrosht ahwoso ich itso uje oyukwẽr jõro shakĩrrza eheth. Olak shi itso Porrosht ir ihyuch toy. <sup>10</sup>Porrosht takashĩm yok uje ishĩm yok erze pibiyo shi itso uje shuu tiyokõr pwertĩt tuu uhwirbe iyeheth wap. Yet de uje shiyokõr ese pwertĩt per kal nohmĩra tyenij shiyokõr debiyo om par uje ye nimehĩ ese pwertĩt <sup>11</sup>pork ich ye õr pwelpe uje ochihĩtsĩm uhwirbe yẽr pork erze uhwirbe uje dechi shi itso Jesucristo. Nĩhyok yet uje ishi eyok hnitew. <sup>12</sup>Ich kuche kihniya ochĩra uje oshiyokõr ese pwertĩt, ochĩra oro o kimiji plata o kimiji kojano po uje ich ihĩrtso o kimiji tabla o kimiji onĩra ihnemyo o kimiji kuche yewo. <sup>13</sup>Erze obiyo uje õr ire oshiyokõr kal nohmĩra ich deeych yet nehe hn tyenij õr Yĩnsirc shuu imeheeych kimiji tokole om o kimiji ye tokolpe pork õr Yĩnsirc tyenij chĩbite jwekita par teychĩm kimiji ewenta o kimiji ye ewentpe. <sup>14</sup>Nos Porrosht aabo oshiyokõr ese pwertĩt uje erze uhwirbe wir shi itso Cristo. Kal nohmĩra kimiji ir ibiyo ewenta asa jwekita ich ire tyenij serz. <sup>15</sup>Per kimiji asa jwekita nos nihna erze ibiyo uje shiyokõr ich wichi pyert ir premyo per shish ir ikirĩt de Porrosht ahĩr. Wichi shi itso hnakĩrbich uje de dahuch eheth hn ir ihyuch duhlu. Tokolĩhi dahuch per nos wir ir kushjãro sihna ire.

<sup>16</sup>Erahalo uje olak Porrosht ir ihyuch hn ir Ichĩbich debuho olak aho. <sup>17</sup>Kimiji yeẽk nihna Porrosht ihyuch ich Porrosht tyenij sihna wichi pork olak Porrosht ir ihyuch hn wichi uu olak Yĩnsirc.

<sup>18</sup>Ye ompe uje shi yeẽk sehnỹer ire. Kimiji olak yeẽk dibĩte uje ire eykdeyoho nãhu ĩrmo ishujãro ich ye ompe, per kimiji duho ire ilo yeẽk uje ye eyuwo tisĩr nãhu ĩrmo ishujãro ich Porrosht shuu ire eykdeyo. <sup>19</sup>Pork erze oso uje ode nãhu ĩrmo ochĩbite uje ich ma õr eykdeyo per par Porrosht ich õr eyuwo ye jukur. Porrosht ahwoso tata shuu itsorz ĩm: —Erze uje ich õr eykdeyo Porrosht shuu õr eyuwo itso trampta uje sontew õr.— <sup>20</sup>Porrosht ahwoso tata toy shuu itsorz ĩm: —Eyok İrhĩch chĩraha uje erze uje õr eykdeyo õr eyuwo ye jukur.— <sup>21</sup>Heke ye ompe uje yeẽk narim oso pork nos wir kuche wir par eyok. <sup>22</sup>Pablo, Apolos, hn Pedro shi õryok itso olak yilo par oyakashĩm olak. Hn ahnũwo ĩrmo hn ese ikirĩt wir par olaklo. Kimiji Porrosht aabo yeẽk toy ich shi toy pork Porrosht sahmũr. Erze uje yesh tĩr olak hn erze uje tyenij tĩr olak nehe wir par takashĩm olak. <sup>23</sup>Cristo wichi olak yĩnsirc, hn Porrosht wichi Cristo ir yĩnsirc.

**Pablo tatim Porrosht aabo erze uje apóstole oshiyokōr.**

**4** <sup>1</sup>Olak tyenij uhuolak eyuwo tisīr uje ōryok shi Cristo ir ibiyo. Tyenij uhuolak eyuwo tisīr uje Porrosht shuu oyanimirāha lahwoso oyitim oso uje Cristo ishi ōr hnitewihi Porrosht ahir pork ye odirehepe. <sup>2</sup>Ye shi erzepe uje oyitim olak. Erze uje Porrosht shuu omasaha par ir aabo ōr bahlwo tyenij shish oshiyokōr uje ire otata. <sup>3</sup>Par yok ich ye latikish uje eychimlo pibiyo kimiji om o kimiji ye ompe, o kimiji jwe teychim. Hn yok itspo ye tiitape kimiji pibiyo om o kimiji mihnūwo. <sup>4</sup>Ye tukuunape kimiji timehī pork ye tikirehepe. Shi eyok Irhīch wichi uje chīraha. Wichi uje tyenij tata kimiji timehī. <sup>5</sup>Moymlo uje uhulo ese yet ma iluom je erze yewo. Tyenij shi anemlo nehech eyok Irhīch cheeshpo nehe pork wichi uje tyenij nos chibīte kuche orhōta uje otsakis. Wichi uje tyenij shuu imeheeych uje oso sehe oniyokōr. Uje taācha nehe ich Porrosht tyenij teychim ōr ibiyo hn tyenij narim kal nohmīr nohmīr kimiji oniyokōr om.

<sup>6</sup>Pishībo watsaklo, erze uje titim olakike shi titeēta yok hn Apolos uje oyiyokorāha olak oyuhu erahalo uje ye ompe aluwelo uje Porrosht ahwoso tata par uje nīhyok olak yeēk uje narim yet hn sepi yet. <sup>7</sup>¿Yeēkpo uje shuu owa ma dich je erze yewo? ¿Asujānikihī uje Porrosht ye dosim owape? Kimiji shi dosimihī owa duhu ilorz ¿ich inaapo heke owa narim owa itso uje owa erz? <sup>8</sup>¿Inaapo heke ebitlo shi itso uje olak de wahacha poōrc hn erze kuche nos de olak ahir hn uhu olak itso ihīr deyo? Ebitlo shi itso uje amsahalo uhu olak itso reyihī wahacha poōrc hn ye ōryok reyihī olak ahir toy. Ich tahmūr par amsahalo par rey heke ich ōryok oyomsaha par reyihī wahacha olak ahir toy. <sup>9</sup>Tibīte uje Porrosht shuu itso uje ōryok de ma uhurc pork ōryok ir apóstole hn kuche mihnūwo shish tīr ōryok. Chibīte ōryok ma uhurc. Wichi chibīte ōryok shuu ōryok itso erze hnakirbo uje tyenij oshuu ōr oshuu otoy. Wichi chibīte ōryok shuu itso par uje wir oteychim ōryok erze uje ode īrmo hn erze anjele toy hn erze oso. <sup>10</sup>Ōryok oyibīte uje shi ōryok itso totihlo pork oyanimirāha uje Jesucristo shiyokōr par oso, per olak ebitlo uje olak eykdeyo pork ye otiislo Jesucristope. Ōryok ye ōryok ukūrbīrsh, per olak ebitlo uje olak ukurbosh. Ebitlo uje oso otola olak, per ich shi itso uje ye otola oryōkpe. <sup>11</sup>Nehech ele ahle yesh ōryok iyuwo sēhi ōryok hn ōryok iilo sēhi ōryok. Ye ōryok ishuwīrsh uje om, hn oso ich otsepyēr ōryok, hn ye ōryok ihyuwo pishīrsh. <sup>12</sup>Shish oyishew obiyo ich oyihnew. Uje ochinehnim ōryok ich oyiyuhu ōryok ahwoso omoho ōr. Uje otsepyēr ōryok ich shish ōryok ewenta. <sup>13</sup>Otatim yewo par uje oshuu otsitak ōryok ich shish ōryok prowa oyuhu ōr aho kiisihī ōryok. Oshuu ōryok itso erze kuche uje waresh uje de nāhu īrmo, hn oshuu ōryok itso pīramo uhrīye.

<sup>14</sup>Ye tichew titim olakpe tuu itsorz par uje tuu apooklo. Shi sehe takit olak pork olak itso uje yok pijo uje ich tahmūr pishi ōr. <sup>15</sup>Okīhniya

oshiyokorãha olak Jesucristo ir iluu per erze uje òr itso olak deyo wir ye òr kihniyape. Shi yok nohmira uje ich yok itso olak deych pork titim olak uje Jesucristo ishi olak hnitewihi Porrosht ahir par uje amsahalo par olak Porrosht aabo <sup>16</sup>heke titim olak par uje shish eëtlo yok. <sup>17</sup>Tuu Timoteo tîr olak. Wichi shi itso yok pijo uje ich tahmürpa. Shish shiyokör uje tahmür pork yok uje titim ìrni hn masaha par Porrosht aap. Wichi tyenij tatim olak par uje shuu olak eyucha uje tiyokör shi itso uje nos tiyokorãha Porrosht aabo uje otakasho lawichihi lekitiyo pork yok Cristo ìr ìbik. <sup>18</sup>Titim olak uje nohmirammo ode olak eheth uje ochibite uje ich ye takaashpe par uje tekirihi olak nehe heke wir onarim ìre <sup>19</sup>per kimiji eyok Ìrhîch nahmür ich takaashpo shichish tekirihi olak. Heke tikiraha kimiji Porrosht Ichibich chihî òr aho par uje shuu òr ukurbosh o kimiji shi odiilehet. <sup>20</sup>Kimiji Porrosht Ichibich iyeebe hn oyehe nêr ich om pork Porrosht ukurbo de òr, per kimiji shi òr ìre odiilehet ich shi òr ahwoso ye jukur. <sup>21</sup>Uje tekirihi olak nehe ¿ich ahmürlo latikpo? ¿Je ahmürlo uje tokõhwa phich par tepyêr olak o kimiji ahmürlo uje tikirêt titir olak hn pehet kiisihi olak pork tahmür uje ahakörlo?

#### Porrosht aap shiyokör mîhnik.

**5** <sup>1</sup>Titim olak. Shish tukunt uje olak eheth yeêk de uje shiyokör mîhnikpa. Erze uje ye odiraha Porroshtpe yelij oniyokör oduhu ìlorz. Wichi hnakirbich ìhi latahacha ahir, <sup>2</sup>hn olak ich olak narim olak. Tyenij shuu olak dosdarak uje wichi shiyokorîhi olak eheth. Ich tyenij eyuhulo olak eheth ese hnakirbich uje shiyokör mîhnt. <sup>3</sup>Ye yok chihî olak ahirpe per tibite shi itso uje pichibich de olak ahir, heke tibitni uje tyenij uhulo wichi tokolihi olak ahir <sup>4</sup>tîra eyok Ìrhîch Jesús ìr iich ese hnakirbich uje yesh shiyokör ese mîhnt. Uje akishlo olak owich ich shi itso uje pichibich de olak ahir hn eyok Ìrhîch Jesús ìr ukurbo de olak ahir toy. <sup>5</sup>Heke tyenij uhulo tokolihi olak ahir ese hnakirbich hn ebitlo Satanás hme par uje wichi sepyêr ìre shuu iim deluu mîhnû. Heke uje terihi ese deeych uje eyok Ìrhîch Jesús cheeshpo nehe ich wichi hnakirbich de eyok ahir toy.

<sup>6</sup>Ye ompe uje shish olak narim olak shi pork olak ewenta ese mîhnt uje ese hnakirbich shiyokör. Erahalo uje shi pan eyhita pîkaap ich shuu nos ese erint masta potita, hn erahalo uje erze kuche mîhnûwo uje de olak eheth ich pîkaap per wisik wisik ich chûr lekitiyo. <sup>7</sup>Heke tyenij uhulo tokolihi olak ahir ese hnakirbich uje shiyokör mîhnik par uje olak shi olak itso ese masta uje ahle ye eyhirâsh pork Cristo wichi uje tooho eyokkite. Cristo shi itso erze obeje uje erze israel oso oshuu oshuu toy par òr ahamich uje iich otsii Pascua. <sup>8</sup>Heke tyenij yiyokörlo eyok ahamich shi itso erze israel oso uje oshiyokör òr ahamich uje otew pan uje ye ìr eyhirâsh. Asa pan eyhita siteêta uu kuche mîhnûwo per yiyokör ese òr

ahamich yuhulo itso pan uje ye eyhirāsh. Erze pan uje ye eyhirāsh wir shi itso erze ahwoso uje ich ūru.

<sup>9</sup>Sehe titim olak uje tichew hutita yata par titim olak par uje ye meylo erze uje ye onōyhi pishye ahirpe, hn erze uje otorāhaye, hn erze uje otsahat loshipo, hn erze uje ma mihñūwo uje oshiyokorīhiye. <sup>10</sup>Uje titim olak tuu itsorz ich ye tokorzihī erze ĩrmo oso uje oshiyokōr erze kuche mihñūwo oshuu itsorz. Ye tokorzihī erze ĩrmo oso uje sehe odukutirāha ire kuche hn erze uje otohīr hn erze uje oteychāha kojano po ochii ir porroshtihī. Kirēhe ilorz ich tyenij atokolihilo ĩrmo. <sup>11</sup>Shi titim olak hutita yata ir ahwoso par uje ye meylo erze Porrosht aabo uje oshiyokōr mihnuwōhoye hn erze uje otorāhaye hn erze uje ye onōyhi pishye ahirpe hn erze uje oshuu loshipo sahat ire hn erze uje otsahat loshipo hn nos wir kuche mihñūwo uje itso hn erze uje sehe odukutirāha ire kuche hn erze uje oteychāha kojano po ochii ir porroshtihī hn erze uje otatim oso yewo par uje oshuu otsitak yewo hn erze uje oshuu yikich sēhi ire hn erze uje otohīr. Ye meylo erze Porrosht aabo uje oshiyokōr erze mihñūwo oshuu itsorz hni uje aakihilo ōr ahīr. <sup>12</sup>Yok pibiyo ye par tepyēr erze uje ye ōr Porrosht aabo. Olak ibiyo wir par epiyerlo erze Porrosht aabo uje oshiyokōr uje ich mihñūwo. <sup>13</sup>Porrosht wichī uje tyenij sepyēr erze uje ye ir aabo. Uhulo tokolihī olak ahīr ese hnakīrbich uje shiyokōr mihñik.

### Uje Porrosht aabo oshiyokosye ich ye ompe otīr jwe ikich.

**6** <sup>1</sup>Sehe titim olak. Uje olak yeēk dihoskos deshībich yehe wichī Porrosht aap ¿inaapo heke ye apooklope uje etīrlo jwe ikich uje ye Porrosht aappe? Tyenij apurlo erze Porrosht aabo par uje onishii. <sup>2</sup>¿Olak je ye erahalope uje deeych yet nehe hn erze Porrosht aabo tyenij omasaha par ōr jwe par oteychim erze ĩrmo oso uje oshiyokōr kuche mihñūwo? Olak tyenij enshiilo erze kuche uje ich kwestpa nehe. ¿inaapo heke ye olak pwele enshiilope ese uje ye kwestpe? <sup>3</sup>¿Olak je ye erahalope uje deeych yet nehe hn eyok jwe par yeychimlo erze anjele uje oshiyokōr mihñūwo? Heke tyenij enshiilo erze kuche uje tīr eyok uje eyok de nāhu ĩrmo. Wir ye kwestpe par enshiilo. <sup>4</sup>Kimijī olak yeniyo odihokosye ¿inaapo heke etīrlo jwe ikich uje ye Porrosht aappe? <sup>5</sup>Shi titim olak tuu itsorz par uje tuu apooklo. ¿Je ye olak yeēk chihī olak ehette uje ich eykdeyo par nishii erze kuche uje olak leshibo oshiyokosye? <sup>6</sup>Porrosht aap hnoy duhut Porrosht aap seya jwe ikich uje ye diraha Porroshtpe. <sup>7</sup>Uje Porrosht aabo oshiyokosye ich oshuu imeheeych uje ye oniyokōrpe uje Porrosht Ichībich tata. Uje yeēk niyokōr mihñikihī owa ich ma om uje shi owa ewenta. Kimijī yeēk torha olak kuchērkh ich ma om shi moymlo, <sup>8</sup>per ahakōrlo mihnuwōho yewo hn ohirlo yewo ōr kushjāro uje wir Porrosht aabo toy. <sup>9</sup>¿Je ye erahalo erze oso uje ich ōr iluu mihñū wir nīhyok ōr owich Porrosht ahīr? Ye ehnyērlo olak. Erze uje ye onōyhi pishye ahirpe nīhyok



ōr owich Porrosht ahir, hnii par erze uje oteeychāha kojano po ochii ir porroshtīhi, hnii par erze uje otorāhaye, hnii erze hnakirbo uje oshiyokōr mihnuwōhoye hn ōhiye ahir. Wir ye ōr owich chihī Porrosht ahirpe, <sup>10</sup>hnii erze uje ōr echiko, hnii erze uje otsahmūr ochukutirāha ire kuche, hnii erze uje otsahmūr oshuu yikich sēhi ire, hn erze oso uje otīr oso yewo hn otatim ōr par uje oshuu otsitak yewo, hnii erze uje oshuu oso par uje sehe otorha ōr kushjāro. Wir ye ōr owich chihī Porrosht ahirpe. <sup>11</sup>Olak yewo antni ahakōrlo uhulo itsorz per Jesús chiyuhu erze kuche mihnuwōhoolak aho shi itso uje churhū olak aho, hn amsahalo par Porrosht aabo pork eyok Irhīch Jesucristo ishi eyok hnitewihī Porrosht ahirkite. Heke Porrosht Ichibich de olak aho hn nishii olak aho.

### Porrosht aabo tyenij oshiyokōr uje Porrosht sahmūr.

<sup>12</sup>Sehe titim olak. Yok pwele nos tiyokōr uje shi yok tahmūr hn ye tikiyuwe leype per ye tahmūrpe pork ye nos wir kuche takashim yokpe par uje shuu tiyokōr uje ich om. Yok pwele nos tiyokōr uje shi yok tahmūr per ye tahmūrpe uje tiyokōr hn tuu erze kuche yakaha yok. <sup>13</sup>Oposo de par uje yahulo hn tīr eyok ijita hn eyok ijita de shi par erze oposo, per deeych yet nehe hn Porrosht tyenij sihna erze kuche osiyer, eyok ijita hn erze oposo. Eyok ikiyo de per ye par uje yiyokōrlo erze kuche mihnuwo uje timcher hn hnakirbo oshiyokōrīhiye uje ye onōyhi pishye ahirpe. Eyok ikiyo shi par yiyokōrlo eyok Irhīch ir ibiyo hn eyok Irhīch wichi uje tibey eyok ikiyo. <sup>14</sup>Porrosht shuu eyok Irhīch ikpokite heke tyenij shuu eyoklo ikpo nehe chīra lakirbo. <sup>15</sup>¿Je ye erahalo uje Porrosht ir aabo wir Cristo ir ikiyo? Ye ompe uje titīr timcharrza waa je yitoro shi itso uje tiyuhu Cristo ikiyo pikaabit par uje tuu chishew asa timcharrza pork nos wir Porrosht aabo wir Cristo ikiyo. <sup>16</sup>¿Je ye erahalo uje hnakirbich uje chishew asa timcharrza waa je yitoro ich tokole shi ōr sohmira? Porrosht ahwoso tata shuu itsorz im: —Erze uje ōr osiyer otokole shi ōr nohmira.— <sup>17</sup>Per uje yeēk ishimīhi ire eyok Irhīch ich ir ichibich iya eyok Irhīch hn ōr ire wir shi ōr sohmira. <sup>18</sup>Heke titim olak. Ahamlo par uje ye ahakōrlo erze kuche mihnuwo uje oso oshiyokōr uje ye onōyhi pishye ahirpe. Nos wir kuche mihnuwo uje yeēk shiyokōr kimiji tohir o kimiji kuche yetpo ich shiyokōr mihnikīhi yet, per uje yeēk shiyokōr erze uje ich mihnuwo uje hnakirbo hn timcher oshiyokōrīhiye ich wichi shiyokōr mihnikīhi ire. <sup>19</sup>¿Je ye erahalo uje olak ikiyo wir Porrosht Ichibich ir ihyuch? Porrosht ishim olak Dechibich par uje shuu debuhu olak aho. Olak yinsirc wichi Porrosht uje tibey olak <sup>20</sup>pork Jesús tooho krus eeych par tiya olak uje ishi olak hnitewihī Porrosht ahirkite, heke tyenij ahakōrlo uje Porrosht sahmūr par uje uhulo ire dich.

### Ahnūwo uje tyenij oso oshiyokōr uje ochiileku.

**7** <sup>1</sup>Sehe titim olak erze uje sehe erahalo uje atimlo yok asa olak hutita ir ahwoso uje asimlo yokni. Ich om uje hnakirbich ye diilekupe <sup>2</sup>per

hnakirbo hn timcher ich okihniya uje oshiyokōr mihnuwōhoye uje ye onōyhi pishye ahirpe hn timcher oshiyokōr mihnuwōho yēr hn hnakirbo oshiyokōr mihnuwōhoye, heke ich ma om uje hnakirbich ir irāhta pishta de, hn ich ma om uje timcharrza ir abich pisht de. <sup>3</sup>Hnakirbich tyenij umuhu nerāhta ahir hn timcharrza tyenij umuhu dabich ahir. <sup>4</sup>Asa timcharrza ir ikiyo ir abich. Wichi uu ir yinsirc hn ese hnakirbich ir ikiyo asa ir irāhta. Wate ir yilahata. <sup>5</sup>Ye ompe uje hnakirbich iim uje umuhu nerāhta ahir hn timcharrza itspo ye ompe uje iim umuhu dabich ahir, per kimiji otakasho deyuwo hn oym pikaap par uje ōr orar otsapur Porrosht ich om. Per uje terihi erze daalo uje ōr ire ochibite par uje ōr orar ich tyenij omuhuye ahirpo par uje Satanás ye nimchaha ōr eyuwo uje mihnūwo hn ye ōr pwele otibey ire hn otorāhaye. <sup>6</sup>Titim olak ahnūwo par uje erahalo. Porrosht ye ditakpe uje ochiileku hn ye ditakpe uje ōr kiimo. <sup>7</sup>Tahmūr uje nos ōr kiimo itso yok, per Porrosht ishim kal nohmira ir ukurbo shuu kināho kināho par uje oshiyokōr uje Porrosht sahmūr pork ye nos ōr ilo yokpe.

<sup>8</sup>Sehe titim olak uje olak kiimo hn uje olak kiime hn erze uje ōr poluwo. Ich om uje ye odiilabey hn ich om uje ye ey olak eku itso yok. <sup>9</sup>Per kimiji ye olak pwele par uje abeylo olak ich tyenij ey olak eku, pork ich ma om uje olak irēhte de o olak abiyo de je uje uhu olak eyuwo mihnūwo uje nīhyok olak irēhte o kimiji nīhyok olak abiyo. <sup>10</sup>Sehe titim erze uje ōr abiyo de o kimiji ōr irēhte de. Ahnūwo ahwoso ye tāra peyuwope. Shi tāra eyok Irhīch. Ye ompe uje timcharrza iim dabich, <sup>11</sup>per kimiji wate noym dabich ich tyenij shish kiime, o tyenij cheeshpo par uje ūhi ese dabich ahirpo. Ese hnakirbich itspo, ye ompe uje iim nerāhta.

<sup>12</sup>Erze uje tyenij titim olak yewo ye tāra eyok Irhīchpe shi tāra yok. Kimiji yeēk chihi uje Porrosht aap hn ir irāhta ye Porrosht aappe hn wate yesh sehe dakaha ahir ich ye ompe uje iim wate. <sup>13</sup>Kimiji timcharrza chihi waa je Porrosht aap hn ir abich ye Porrosht aappe per yesh sehe dakaha ahir ich ye ompe uje wate iim ire. <sup>14</sup>Hnakirbich uje ir irāhta Porrosht aap per ire ye Porrosht aappe wichi par Porrosht ich shi itso uje ire aap per ye Porrosht aappe. Hn timcharrza waa je ye Porrosht aappe per ir abich Porrosht aap par Porrosht ich shi itso uje ire aap per ye Porrosht aappe. Porrosht shiyokōr shuu itsorz par uje ye ōr aabo otokole ilo erze uje ye odiraha Porroshtpe per ele ahle wir ye ilorzpe. <sup>15</sup>Sehe titim olak kuchit yetpo. Kimiji hnakirbich ye Porrosht aappe per ir irāhta Porrosht aap hn sehe noym nerāhta ich ir irāhta ye narhak ire. Hn timcharrza itspo kimiji ye diraha Porroshtpe hn sehe noym dabich uje wichi Porrosht aap ich ir abich ye narhak ire. Porrosht ye dibitpe uje erze ir aabo otsontew erze timcher uje oym ōr o kimiji hnakirbo uje oym ōr ich shi itspo. Porrosht sahmūr uje ir aabo ōr aho kiis. <sup>16</sup>Owa uje owa

timchar ye eraha kimiji deeych yet nehe hn akashim abich par uje uhu masaha toy par Porrosht aap, hn owa uje owa hnakirap ye eraha kimiji deech yet nehe hn akashim erähta par uje uhu masaha toy par Porrosht aap.

<sup>17</sup>Heke kal olak nohmire tyenij shish shiyokör uje eyok Irhich ishim ire pork Porrosht chihla olak par olak ir aabo. Wir uje shish titim Porrosht aabo uje otakasho lawichihä lekityo. <sup>18</sup>Kimiji Porrosht diihla yeëk par uje masaha par ir aap uje ir yarta de waa je iich otsii sirkunsisyon ich ye ompe uje prowa diyuhu asa ir yarta. Kimiji ir yarta nihyoköho ire waa je iich otsii sirkunsisyon hn masaha par Porrosht aap ich ye ompe uje ire chibite ir yarta. <sup>19</sup>Kimiji owa yarta chihä waa je iich otsii sirkunsisyon o kimiji nihyok ich shi itsye, ye latikish. Shi uje ahakörlo uje Porrosht ahwoso tata wichi uje ich om. <sup>20</sup>Heke kal olak nohmire uje masaha par Porrosht aap ich ye niyokör kuche par shuu ire kinäha. Shi iyem uje Porrosht tatim ire. Shish tyenij itso uje wapni de uje Porrosht chihla ire par uje masaha par ir aap. <sup>21</sup>Heke kimiji owa ör yilak hn amsaha par Porrosht aap ye uhu eyuwo tisir hn owa yuhwo. Kimiji owa pwele enshii uhu ensirc tära owa ich atokole heke ye owa ir yilakpe. <sup>22</sup>Kimiji olak yeëk chihä uje masaha par Porrosht aap per wichi ör yilak ich wichi ye eyok Irhich ir yilakpe, per kimiji wichi ye oso ör yilakpe uje masaha par Porrosht aap ich wichi Cristo ir yilak. <sup>23</sup>Uje Cristo tooho krus eeychkite ich tiya olak par ir yilo pork ishi olak hnitewihä Porrosht ahir heke ye ompe uje asimihilo olak yeëk par uje chii olak deloho. <sup>24</sup>Pishibo watsaklo, heke titim olakpo. Kal olak nohmire uje masaha par Porrosht aap ich ye niyokör kuche par uje duhu ire kinäha. Shish tyenij itso uje wapni de uje Porrosht chihla ire par uje masaha par ir aap.

<sup>25</sup>Sehe titim olak uje yahpaa ey olak ekupe o kimiji yahpaa ey olak abeyppe. Eyok Irhich ye tatim yok latik uje tyenij titim olak per shi titim olak uje tära yok peyuwo. Porrosht sosir yok heke erahalo uje ye tehnyer olakpe. <sup>26</sup>Ele ahle shish kuche mihnüwo tär eyoklo heke tibite uje kal olak nohmire ich ye niyokör kuche par shuu ire kinäha. Shish tyenij shiyokör erze obiyo uje yesh shiyokör. <sup>27</sup>Kimiji irähta chihä ich ye moym, hn kimiji ye irähtirash ich ye eyäha. <sup>28</sup>Per kimiji ey eku ich ye mihnikpe, hn kimiji apibitita diilabey ich ye niyokörpe uje mihnik. Per ich kuche mihnüwo ich kihniya heke erze uje ochiileku hn erze uje ochiilabey ich tyenij mihnik tär ör. Ye tahmürpe uje erze kuche mihnüwo tär olak heke titim olakike tuu itsorz. <sup>29</sup>Pishibo watsaklo, titim olak ahnüwo pork ich yej Cristo cheeshpo nehe heke erze uje ör irähte de tyenij ochiyuhu ire shi oshuu ire itso uje ye ör irähtirsh par uje oshiyokör Cristo ir ibiyo. <sup>30</sup>Erze uje oyerh ye ompe uje oyerhpa oshuu daalo kihniya, hn erze uje ich ör ayala ye ompe uje oshuu ör ahmiyo sontew uu ör ibiyo uje Porrosht ishim ör par uje oshiyokör. Erze uje otiya kuche ye ompe uje shish oshuu

deyuwo tis̄ir ir kushjāro. <sup>31</sup>Erze uje otiya kuche hn ochiwāha ye shi tyenij oduhu ilorz par uje oshiyokōr Cristo ir ibiyo toy. Erze kuche uje de nāhu ĩrmo wir shi sihna ire shichish.

<sup>32</sup>Ye tahmūrpe uje shish uhu olak eyuwo tis̄ir kuche. Hnakirbich uje ye irāhtirash shish shuu deyuwo tis̄ir̄hi eyok Irhīch ir ibiyo. Shi sehe duhu eyok Irhīch ehēt kiisihi ire. <sup>33</sup>Per hnakirbich uje irāntash ma shuu deyuwo tis̄ir̄hi erze kuche uje de nāhu ĩrmo par uje shuu nerāhta ehēt kiisihi ire. <sup>34</sup>Heke shuu deyuwo tis̄ir̄hi Porrosht hn shuu deyuwo tis̄ir̄hi nerāhta toy. Timcharrza waa je poluu hn timcharrza waa je phar ōr itspo, shi oshuu deyuwo tis̄ir̄hi eyok Irhīch par uje oshuu ehēt kiisihi ōr ire. Nos wir kuche uje oshuu deyuwo tis̄ir hn nos wir kuche uje oshiyokōr wir par eyok Irhīch, per timcharrza waa je abichish shi shuu deyuwo tis̄ir̄hi erze kuche uje de nāhu ĩrmo par uje shuu dabich ehēt kiisihi ire. <sup>35</sup>Titim olak ahnūwo pork sehe takashim olak, ye par uje tahirm olakpe. Sehe tuu ahakōrlo uje ich ma om, hn ahakōrlo eyok Irhīch ir ibiyo hn uhu olak eyuwo chihī lalerc.

<sup>36</sup>Uje yeēk ir ihyāta chihī hn shuu deyuwo tis̄ir uje ich sahmūrpa wate hn wate terihī leherc, hn sehe nōyhi wate ahir hn ye pwele seempe ich ma om uje ōhiye ahir pork sehe niyokōr duhu ilorz. Ye mihnikpe. <sup>37</sup>Per kimiji yeēk duhu deyuwo tis̄ir uje yahpaa nahmūr diilekupe hn pwele iyem pork chiraha tibey ire par uje ye niyokōr uje ich mihnik wichi shiyokōr uje ich om. <sup>38</sup>Heke ese uje chiileku shiyokōr uje ich om hn ese uje yahpaa nahmūrpe uje diileku shiyokōr uje ich ma om.

<sup>39</sup>Timcharrza shish tyenij sakaha dabich ahir uje ehn ika. Kimiji ir abich toy ich hnii wate pwele chiilabey per shi tyenij ihi duhut Porrosht aap ahir. <sup>40</sup>Ich ma om uje shi wate poluu hn ehēt kiis. Ahnūwo uje titim watake tuu itsorz pork Porrosht fchibich takashim yok.

### Ode uje oshimihī loshipo ěro kojano po.

**8** <sup>1</sup>Sehe titim olak erze olak ahwoso uje atimlo yok uje kimiji om otew erze loshipo ěro uje oshuu hn oshimihī kojano po uje ochii porroshtihī o kimiji ye ompe. Nos yirahalo kuche. Erze oso uje ochiraha kuche ōr pwele onarim ire, per ich ma om kimiji onahmūrpe ye otakashimye. <sup>2</sup>Uje yeēk tata uje nos chiraha kuche wichi yēr̄ij dirahapa uje tyenij chiraha. <sup>3</sup>Per uje yeēk sahmūr Porrosht ich Porrosht chiraha ire pork chiihla ire heke wichi ir aap.

<sup>4</sup>Sehe titim olak kimiji om uje elilo erze kuche ěro uje oshimihī kojano po uje ochii porroshtihī o kimiji ye ompe. Yirahalo erze kojano po wir ye latikish, ye Porroshtpe, hn yirahalo uje shi Porrosht sohmira uje de. <sup>5</sup>Ode uje otata otsii: —Porrosht ich kihniya uje de poōrc hn uje de lika hnimich.— Heke par ōr ire ich ōr porrosht kihniya hn ich ōr irhē kihniya. <sup>6</sup>Per par eyok ich shi Porrosht sohmira, wichi uu eyok Deych. Wichi uje

nos shiyokōr erze kuche uje de, hn eyok de shi par uje eyok narim ire. Shi eyok Irhīch sohmira de. Wīchi Jesucristo uje nos shiyokōr kuche uje de. Ire uje shuu eyok Porrosht aabo.

<sup>7</sup>Per ode uje ōr eyuwo tisīr uje porrosht kināho ode ich kihniya per nīhyok. Porrosht aabo nohmīramo ode uje antni oteychāha erze kojano po. Ōr eyuwo shish tisīr uje erze kojano po ich ūru uje oshimīhi erze kuche ēro heke uje otew ich shuu ochuuna uje oshiyokōr uje mīhnik. <sup>8</sup>Kimiji elilo erze kuche ēro o kimiji ye elilope ich ye latikish. Porrosht shish sahmūr olak. <sup>9</sup>Abeylshīp olak par uje ye wir oneēt olak erze uje yērīd odīraha pishi Porrosht hn uhulo oshiyokōr erze uje wir oshuu deyuwo tisīr uje Porrosht ye nahmūrpe per olak erahalo uje ye mīhnikpe. <sup>10</sup>Owa eraha erze kuche. Kimiji yeēk teychim owa uje akaha erze kojano po ir ihyuch hn aak heke uhu seēt owa hn tew toy erze uje oshuu hn oshimīhi erze kojano po pork wir ye direhepe erze uje eraha heke shuu deyuwo tisīr uje Porrosht ye nahmūr uje tew erze kuche ēro heke ye ompe uje ire tew. <sup>11</sup>Uhu ese eshībich shiyokōr uje mīhnik shi pork ye direhepe. Cristo tooho krus eeychkite par ese eshībich toy. <sup>12</sup>Heke uje uhu olak leshībo oshiyokōr uje ich mīhnūwo ich ahakōrlo mīhnikīhi ōr. Uhulo ochuuna uje oshiyokōr uje ich mīhnūwo pork ye odirehepe. Uje ahakōrlo uhulo itsorz ich ahakōrlo mīhnikīhi Cristo. <sup>13</sup>Heke kimiji taw erze kuche ēro ich tuu ese pishībich shiyokōr uje ich mīhnik, ich ma om uje ye taw par uje ye tuu niyokōr uje ich mīhnik.

**Pablo wichi apóstol heke pwele sapur ōr kuche.**

**9** <sup>1</sup>Sehe titim olak. Nīhyok uje yeēk pwele sontew yok par uje ye tiyokōr uje tikiraha uje ich om. Yok apóstol. Tukumo eyok Irhīch Jesusni. Pibiyo shi uje tuu amsahaloni par Porrosht aabo. <sup>2</sup>Kimiji yewo ye odirehepe uje yok apóstol mahn olak erahalo uje yok apóstol pork tuu amsahaloni par olak Porrosht aabo. <sup>3</sup>Ahnūwo uje titim erze oso uje otsotiis uje yok apóstol. <sup>4</sup>Ōryok ye ōryok kināhope hn erze apóstole yewo ye ōr kināhope. Ōryok itsye. Heke ōryok pwele oyapur Porrosht aabo par uje oshim ōryok uje par oyahu hn par uje oyoho. <sup>5</sup>Kimiji ōryok irēhte chīhi uje Porrosht eebe ich ōryok pwele oyukwii ōr itso erze apóstole yewo uje ohnoy nerēhte hn itso uje erze eyok Irhīch Jesús ir leshībo ohnoy nerēhte hn itso uje Pedro hnoy toy. <sup>6</sup>Bernabé hn yok ye ōryok kināhope hn erze apóstole yewo ye ōr kināhope. ¿Inaapo tyenij oyishew obiyo par uje oyiya ōryok poso? <sup>7</sup>¿Yeēkpo uje masaha par ohyerptos hn tyenij tiya kuche uje nesita? Nīhyok. ¿Yeēkpo uje chukwēr uva hn ye dohope? Nīhyok. ¿Yeēkpo uje tibey erze obeji hn ye doho ishope uje chiyuhu? Nīhyok. <sup>8</sup>¿Je shi titim olak uje tāra yok peyuwo? Ye titim olakpe tuu itsorz. Porrosht ahwoso tata shuu itsorz <sup>9</sup>pork Porrosht ahwoso uje Moisés chichewkita tata shuu itsorz im: —Uje weyt tarāha

trigo hnimich par shuu yuhur tokole ich ye aharu ahwo par uje pwele taak.— Porrosht ye duhu deyuwo tisir̄hi ese weytpē. <sup>10</sup>Shi shuu deyuwo tisir̄hi eyok. Shuu ochichew erze lahwoškite par uje yiraha uje erze uje ochishew obiyo tyenij oshi ōr uje otserz. Ese uje chukwēr jōro tyenij somtis hnimich wap hni chukwēr hn iyem erze jōro ee uje ir yinsirc tyenij ishim ire pikaabit. Ich shi itso ese yet uje chekushu erze jōro ee. Wichi tyenij iyem par uje ishim ire pikaabit toy. <sup>11</sup>Heke uje oyitim olak Porrosht ahwoso ich shi itso uje oyukwer̄hi olak aho. Ich ye mihn̄kpe uje asimihilo ōryok olak kuche uje ōryok nesita. <sup>12</sup>Yewo ochiraha uje ich om uje otsapur olak par uje akashimlo ōr per ich ma om uje ōryok uje oyakashim olak oyapur olak per ye oyapur olakpe.

Shi ōryok ewenta uje kuche nihyok̄hi ōryok ahir par uje ye Cristo ir ibiyo sehepe uje oyitim ōr uje Cristo ishi ōr hnitewihi Porrosht ahirkite. <sup>13</sup>Erahalo erze uje ochishew obiyoho templo patikit ehēt ōr poso tāra erze uje oshimihi Porrosht, hn erze uje otibey ese altar uje otserūhu loshipo par oteeychāha Porrosht erze loshipo ēro pikaabo wir par ōr ire. <sup>14</sup>Ele ahle ich itso uje antni pork eyok Irhich tata erze uje otsanimirāha ir ahwoso otatim oso uje ire ishi ōr hnitewihi Porrosht ahirkite hn erze uje ōr nesita tāra erze uje oshimihi Porrosht. <sup>15</sup>Yok pwele tapur olak tuu itsorz per yelij tapur olak. Ahnūwo uje tichew tibite ana hutita ye par uje tapur olak kuchepe par uje tuu asimlo yok. Ich ma om uje tikiti je uje tapur olak poso uje tanimirāha Porrosht ahwoso pork kimiji tapur olak tuu itsorz ich ye yok pwele titim oso uje nihyok pibahat uje tanimirāha Porrosht ahwoso. <sup>16</sup>Uje titim oso uje Jesús ishi ōr hnitewihi Porrosht ahir ich ye ompe uje yok narim yok. Porrosht wichi uje tatim yok par tiyokōr erze ir ibiyo. Kimiji ye tiyokōr ich mihn̄kpa par yok, <sup>17</sup>per kimiji tahmūr tiyokōr uje Porrosht tatim yok ich yok premit de. Kimiji ye tahmūr tiyokōr uje ire tatim yok hn shi tiyokōr ich nihyok ye yok premitikish. <sup>18</sup>¿Latikpo uje yok premyo? Yok premyo wichi uje tanimirāha titim oso uje Jesús ishi ōr hnitewihi Porrosht ahirkite hn nihyok ye ir bahatikish. Ye tapur olakpe par uje tuu eshilo yok uje titim olak tuu itsorz.

<sup>19</sup>Ye yok ōr yilakpe per tibite tuu yok itso uje oso ōr yilak par uje tuu omasaha par Porrosht aabo ich ma okihniya. <sup>20</sup>Uje yok de israel oso ōr ahir ich tiyokōr tuu yok itso uje oshiyokōr par uje tuu omasaha par Porrosht aabo. Hn erze yewo uje oshiyokōr asa ley waa je Moisés chichewkite ich tiyokōr tuu yok itso ōr. Ich ye par yokpe asa ley per shi tiyokōr teēt ōr par uje tuu omasaha ich okihniya par Porrosht aabo. <sup>21</sup>Hn erze uje ye ōr israel osope uje ye asa ley chih̄i ōr ahirpe ich tiyokōr tuu yok itso ōr par uje tuu omasaha par Porrosht aabo. Shish tiyokōr erze ley uje tāra Porrosht uje Cristo chibite. <sup>22</sup>Uje yok de wir ōr ahir erze uje ich ōr kaso yahpaa odiraha latik ich shi tikinta ōr tiyokōr tuu yok itso ōr par uje takashim ōr par uje tuu omasaha par Porrosht aabo. Heke teēt oso

ör iluu uje kinêhe kinêhe par uje tuu sohmiramo omasaha par Porrosht aabo.

<sup>23</sup>Tanimirãha Porrosht ahwoso par uje tuu ochiraha uje Jesús ishi òr hnitewihi Porrosht ahirkite hn uje omasaha par Porrosht aabo ich òr ayla heke ich shuu yok ayla toy.

<sup>24</sup>Olak erahalo, erze uje sehe ochoshi ich nos ooshi per shi sohmira uje serz. Wichì uje oshim premyo. Olak shi opak itso erze uje ooshi. Kimiji ahakòrlo Porrosht ibiyo uhulo tokole om ich erzlo erze premyo. <sup>25</sup>Nos wir uje sehe ochoshi tyenij otibey ire par uje òr pwele otserz. Hn ese uje serz ich oshiyokòr wolt ochìra iraho ìhyo par uje ochimchaha huta, per wir shi sihna ire shichish. Eyok premyo uje Porrosht ishim eyok wir uje yelij nihna ire.

<sup>26</sup>Yok tibite uje shi tiyokòr pibiyo, ye tuu yok ilo yeèk uje shi uushi dal lekityo, hnii ye yok ilope erze uje shi oshuu del ichibiyo. <sup>27</sup>Tikibey pishi yok par uje ye tiyokòr uje mihnik, pork uje yuwir uje tanimirãha Porrosht ahwoso titim oso ich yok premit de pork ye tiyokòrpe uje ich mihnik.

#### Ye ompe oteychãha kojano po.

**10** <sup>1</sup>Pishibo watsaklo, sehe titim opak uje tokolìhi eyoklo poruwo wishkìte. Nos oyehe asa ukuhurrza nêr uje Porrosht shuu iyeebe, hn nos ochikãha asa onoota bahluta ehèt waa je ich otsii Mar Rojo. <sup>2</sup>Nos wir òr ire shi itso uje otohirm orìhi asa ukuhurrza ehèt uje oyehe nêr hn shi itso uje otohirm orìhi asa onoota bahluta ehèt par uje òya Moisés. <sup>3</sup>Nos wir òr ire otew erze oposo uje Porrosht ishim òr, <sup>4</sup>hn nos wir òr ire oho ese awit uje Porrosht ishim òr uje tãra ese kojach. Ese kojach shi itso uje ìya òr uje awit tãra uje ohno. Ese kojach wichì shi itso Cristo. <sup>5</sup>Per ma okihniya oshiyokòr uje Porrosht ye nahmürpe heke shuu otooho wahachkìte hnimich uje isa. <sup>6</sup>Erze kuche mihnũwo uje tìr òr shuu yìraha uje ye ompe yahmür erze kuche mihnũwo yuhu eyok itso òr, <sup>7</sup>heke opak ye ompe uje eeychãhalo kojano po uhu opak itso òr. Porrosht ahwoso tata shuu itsorz im: —Erze oso otsakir par uje otaak hn oho hn oyehet par uje oshiyokòr weyla hn oshiyokòr mihnuwòhoye.— <sup>8</sup>Erze kuche shiyokorãha eyok uje ye ompe hnakirbo hn tímcher oshiyokorìhiye uje mihnik, hnii otorãhaye, hnii hnakirbo hnakirbo òhiye ahìr, hnii tímcher tímcher òhi yèr ahìr, hnii nos wir kuche uje itso wir. Erze israel oso òr poruwo wishì oshiyokòr oshuu itsorkìte heke shiyehe wichì deeych hn beynti tre mil oso otoy. <sup>9</sup>Deeych yet hn yewo otsepì eyok ìrhìch hn echìre ches òr shuu okihniya otoy. Ye epìlo eyok ìrhìch uhu opak ìlo òr. <sup>10</sup>Ye eyehnimlo Porrosht uhu opak ìlo erze uje ochinehnmì Porroshtkìte heke Porrosht ìr anjel tìr òr hn shuu òr shuu otoy. <sup>11</sup>Nos wir erze kuche uje tokolìhi erze eyok poruwo wishkìte wir par shuu yìrahalo uje ye ompe uje yiyokòrlo erze mihnũwo uje oshiyokòrkìte oshuu itsorz. Porrosht shuu ochichew

lahwoskite par uje oshiyokorāha eyok uje yesh eyok ika uje yej terihi ĩrmo uhurc. <sup>12</sup>Heke ese uje narim ire pork chibite uje yelij duhu ire ilo uu ir poruwo wishi oshiyokorkite tyenij tibey ire par uje ye niyokor duhu ire ilo or. <sup>13</sup>Ye shi olakpe uje erze kuche tir olak par uje shuu ahakorlo uje ich mihnūwo pork erze uje tir olak tir oso yewo toy. Porrosht wichi uje shish tibey olak. Yelij duhu erze kuche mihnūwo tir olak uje ich dospa nehech ye olak pwele par uje olak ewenta, per uje erze kuche mihnūwo tir olak par uje sehe duhu ahakorlo uje mihnik ich wichi takashim olak par uje olak pwele atokolihilo erze uje ich mihnik. Heke olak pwele ahamlo erze kuche mihnūwo hn ye ahakorlo.

<sup>14</sup>Pishibo watsaklo, heke titim olak par uje ahamlo erze kojano po uje oso oteychāha par uje ye eeychāhalo toy. <sup>15</sup>Titim olak uje olak eykdeyo, uhu olak eyuwo tisir kimiji ũru erze uje titim olakike. <sup>16</sup>Uje yooholo ese uva otich uje de asa basta eheth ich yina Porrosht hn eyok eyucha uje Jesús tooho krus eeychkite hn ir armista noshi par uje ishi eyok hnitewihi Porrosht ahir. Uje yahu ese pan ich eyok eyucha Cristo ir ikiyo uje ich dospa uje tooho krus eeychkite. <sup>17</sup>Eyoklo kihniya uje yahulo ese pan uje shi sohmira, heke eyok ikiyo shi itso uje sohmira, pork eyok Cristo ir ikiyo pork shiyehe wichi ese pan uje yahulo yakishlo. <sup>18</sup>Uhu olak eyuwo tisir erze israel oso. Uje otew erze loshipo uje oshuu hn ochibite altar eeych par oshimihhi Porrosht ich shi itso uje otaakihhi Porrosht ahir. <sup>19</sup>Uje titim olak tuu itsorzni ich ye tibitpe uje erze kojano po wir Porrosht. Wir ye latikish, hn erze loshipo ero uje oshuu hn oshimihhi erze porrosht kināho uje kojano po wir ye latikish. <sup>20</sup>Uje titim olak uje wir ye latikish ich shi sehe titim olak erze uje ye odiraha Porroshtpe oshuu erze loshipo par uje oshimihhi erze kojano po per ich shi oshimihhi demonyo, ye odosimihhi Porroshtpe. Heke ye meylo or uje oteychāha erze kojano po pork ye tahmūrpe uje meylo erze demonyo. <sup>21</sup>Ich om uje ehelo ese otich uje de asa basta eheth uje oshiyokor Santa Cena per ye ompe etirlo ese owich par ehelo ese otich uje oho par uje oteychāha demonyo. Ich om uje elilo ese pan uje oshiyokor Santa Cena per ich ye ompe uje etirlo ese owich par elilo erze oposo uje oshiyokor or ahamich par demonyo. <sup>22</sup>¿Je om uje yiyokorlo yuhulo itsorz hn yuhulo Porrosht chesdelo? ¿Je eyok ukurbo sowe ire?

### **Kuche uje Porrosht aabo tyenij oshiyokor.**

<sup>23</sup>Sehe titim olak. Nos eyok pwele yiyokorlo uje shi eyok yahmūr hn ye yiyuwe leype per ye nos wir kuche takashim eyoklope. Eyok pwele yiyokor uje shi eyok yahmūr per ye nos erze kuche duhu eyok iluu ompe ilo eyok ĩrhich. <sup>24</sup>Ye ompe uje yeek shi shuu deyuwo tisir uje ich om par ire. Tyenij shuu deyuwo tisir uje ich om par yewo toy. <sup>25</sup>Etirlo ese owich uje ochiwāha kuche ero par uje eylo hn elilo. Ye atimlo or on: —¿Tāra



iraãpo?— par uje ye uhu olak eyuwo tisĩr uje erze ěro ich mĩhnũwo, <sup>26</sup>pork Porrosht wichi uu ĩrmo yĩnsirc, hn nos wir kuche uje de eheth wichi shiyokõr. <sup>27</sup>Kimiji yeẽk uje ye Porrosht aappe tatim owa par uje aakihi ire ahĩr, kimiji ahmũr ich bo Mẽya ire. Ew uje ire ishĩm owa. Ye atĩm ire je shi duhu tãra iraãpo erze loshipo ěro kimiji wir uje oshimĩhi kojano po par uje ye uhu eyuwo tisĩr uje wir mĩhnũwo. <sup>28</sup>Per kimiji yeẽk tatim owa im: —Oshimĩhi erze loshipo ěro kojano poko,— heke ye ompe uje ew pork wichi tatim owaka shuu itsorz. Ye ompe par uje uhu ire shiyokõr mĩhnũwo pork wichi chibite uje Porrosht ye nahmũr uje tew. <sup>29</sup>Wichi shuu deyuwo tisĩr uje wir ich mĩhnũwo ye owape uje uhu eyuwo tisĩr, heke ye ompe uje ew erze kuche ěro hn uhu ire shiyokõr uje ich mĩhnik. Ĵĩnaapo heke ye yok pwelpe par taw shi pork wichi shuu deyuwo tisĩr uje wir ich mĩhnũwo? Par yok ich ye mĩhnũwope uje taw erze kuche ěro. <sup>30</sup>Kimiji tikina Porrosht uje taw erze kuche ěro Ĵĩnaapo uje yewo ochibite uje tiyokõr uje mĩhnik? <sup>31</sup>Nos wir kuche ěro uje elilo hn uje ehelo hn nos wir kuche yewo uje ahakõrlo ich shish tyenij olak narim Porrosht uhulo dich. <sup>32</sup>Ye uhulo erze israel oso oniyokõr uje ich mĩhnik hnii erze dihupo kinãho hnii erze Porrosht aabo. <sup>33</sup>Shi tyenij ahakõrlo uhulo olak ilo yok. Nos tiyokõr wir kuche par uje tuu oso õr aho kiisihi yok. Ye tiyokõrpe erze uje ich om shi par yok. Tiyokõr uje ich om par nos wir erze yewo toy par uje tuu omasaha par Porrosht aabo toy.

**11** <sup>1</sup>Eẽtlo yok pork yok teẽt Cristo.

### Ich om par timcher õr akĩre berzo.

<sup>2</sup>Titim olak. Tahmũr uje shish olak eyucha yok hn ahakõrlo uje titim olakni. <sup>3</sup>Sehe tuu erahalo uje Cristo wichi uu hnakirbo õr yĩnsirc, hn kal timcharrza uje ĩr abich de, wichi uu ĩr yĩnsirc, hn Cristo ĩr yĩnsirc wichi Porrosht. <sup>4</sup>Hnakirbich uje orar sapur Porrosht o kimiji nanimĩrãha Porrosht ahwoso uje sajuwe deheta ich wichi ye tola nensirc Cristope. <sup>5</sup>Per kimiji timcharrza orar sapur Porrosht o kimiji nanimĩrãha Porrosht ahwoso hn ye lajuwe lehetape wate ye tola labichpe pork wichi uu ĩr irhĩch. Uje ye lajuwe dehetape ich shiyokõr shi itso uje tuhu deheta sihnshĩp. <sup>6</sup>Kimiji wate ye nahmũr lajuwe leheta ich ma om uje tuhu deheta hn sihnshĩp, per kimiji tuhu leheta ich shuu pook je ma om uje wate ye tuhu leheta per tyenij sajuwe leheta uje orar. <sup>7</sup>Ye ompe uje hnakirbich sajuwe leheta uje ire orar o kimiji nanimĩrãha Porrosht ahwoso pork wichi Porrosht shiyokõrkite shuu itso ire. Porrosht ich dich hn shuu hnakirbo õr deyo toy. Per kimiji asa timcharrza lajuwe leheta ich shuu imeheeych uje ese hnakirbich ich dich. <sup>8</sup>Porrosht ye niyokõr hnakirbich petikkite nãra timcharrza arzibich. Shi shiyokõr timcharrza chĩra hnakirbich arzibich. <sup>9</sup>Ye niyokõr hnakirbich petikkite par timcharrza ĩr ihyẽrak. Shi shiyokõr asa timcharrza par hnakirbich

ihyẽra. <sup>10</sup>Heke ich om uje timcharrza sajuwe deheta par chibite orhõta uje ir abich ich dich hn par nos wir anjele oteychim ire hn ochiraha uje tola dabich. <sup>11</sup>Kimiji nĩhyok hnakirbo ich nĩhyok timcher o kimiji nĩhyok timcher ich nĩhyok hnakirbo pork nos õr nesitye. <sup>12</sup>Porrosht shiyokõr timcharrzkite chĩra hnakirbich arzibich per ele ahle hnakirbo oshũrha otãra timcher hn Porrosht nos shiyokõr erze kuche uje de poõrc hn de hnimichkite. <sup>13</sup>Sehe tuu uhulo olak eyuwo tisĩr. ¿Je om uje timcharrza orar sapur Porrosht hn ye lajuwe lehetape? Ye ompe. <sup>14</sup>Ich nos ochuuna uje ich mĩhnik uje hnakirbich iimihi lakĩrt, <sup>15</sup>per par timcharrza ich om uje ir akĩrt berzak pork ich ma ihĩrt par ire. Porrosht ishim wate akĩrt par sajuwe deheta. <sup>16</sup>Kimiji olak yeẽk ye nahmũr uje oiyikorãha oso oyuhu itsorz ich tyenij chiraha uje nos wir Porrosht aabo hn õryok eyuwo itsye.

### Uu Santa Cena ir iluu.

<sup>17</sup>Titim olak. Ye tahmũrpe erze uje ahakõrlo. Uje akishlo olak owich ich ye ahakõrlope uje ich om. Ahakõrlo uje ich mihnũwo. <sup>18</sup>Wap sehe titim olak uje shish tukunt uje akishlo olak owich ich ehoklo olak. Ye tokotiispe erze uje shish otatim yok. <sup>19</sup>Shi ehoklo olak heke Porrosht shuu imeheeych uje yeniipo olak eheth uje õr Porrosht aabo pisho. <sup>20</sup>Uje akishlo olak owich par uje ahakõrlo Santa Cena ich ye Santa Cenape ese uje ahakõrlo, <sup>21</sup>pork uje terihi orta par uje aaklo wap ich ekutirãha olak erze oposo par uje elilo. Ye anemlo erze yewope par uje otew toy. Uhulo iyehi õr. Shi õr iyuwo sēhi õr, hn olak yet de uje shuu yikich sēhi ire. <sup>22</sup>Olak ihyuwo de par uje aakihilo hn ehelo. Uhulo erze Porrosht aabo yewo shi itso uje ye õr jukur, hn uhulo opook erze uje õr losuhlaabo. ¿Titim olak latikpo? Ye ompe uje titim olak uje ahakõrlo uje ich om.

<sup>23</sup>Ich titim olakpo ahnũwo uje tãra eyok Irhĩch uje titim olakni. Shiyehew wichi dihlakkite uje ehñ yahpaa Judas dosim eyok Irhĩch Jesús erze oso uje otsitak ire hn Jesús chishew ese pan. <sup>24</sup>Nihna Porrosht hn sehek. Tatim õr im: —Nãhu yok pẽro. Tokosim yok ahnũwo oso pork tyenij tikitihi olak. Ahakõrlo uhulo itsorz par uje olak eyucha yok.— <sup>25</sup>Uje ich nos oteku hn Jesús chishew asa basta uje otich de eheth hn tatim õr im: —Ele otich uje de ana basta eheth shi titeẽta ahnũwo ahwoso ahlo uje titim olak pork tyenij tikiti hn parmista noshi. Uje ahakõrlo ich uhulo itso ese uje tiyokõrke hn ehelo ese otich nehe ich tyenij olak eyucha yok.— <sup>26</sup>Uje elilo ese pan hn ehelo ese otich uje de asa basta eheth ich uhulo imeheeych uje eyok Irhĩch ishi õr hnitewihi Porrosht ahĩrkite. Shish ahakõrlo nehech eyok Irhĩch cheeshpo nehe.

<sup>27</sup>Uje yeẽk shiyokõr uje ich mihnũwo hn ye nishiipe hn tew ese pan hn ihi ese otich uje de asa basta eheth wichi shi shiyokõr mihnikĩhi eyok Irhĩch ir ikiyo hn ir armista. <sup>28</sup>Heke uje ehñ yahpaa odoho Santa Cena ich tyenij uhu olak eyuwo tisĩr wap kimiji ahakõrlo uje mĩhnik o kimiji

ye ahakōrlope. Kimiji ahakōrlo uje m̄hnik hn ye enshiilope ich ye ompe uje ehelo asa Santa Cena. <sup>29</sup>Ese uje tew ese pan hn ihi ese otich uje de asa basta ehēt hn ye duhu deyuwo tis̄rpe uje Cristo tooho par ire, wichi tew ese pan hn ihi ese otich shuu itsorz par uje shuu Porrosht sepȳr ire. <sup>30</sup>Heke ich olak kihniya uje ye olak uk̄rbirsh, hn yewo ōr permo, hn olak nohm̄ramo otoy. <sup>31</sup>Per kimiji yuhu eyok eyuwo tis̄r wap kimiji yiyokōrlo uje m̄hnik o kimiji ye yiyokōrlope par uje yinshiilo eyok ich ye eyok Irh̄ich lepȳr eyokpe. <sup>32</sup>Deeych yet nehe hn eyok Irh̄ich teychim eyok kimiji yiyokōrlo uje om o kimiji yiyokōrlo uje m̄hnik. Kimiji yiyokōrlo uje m̄hnik ich wichi sepȳr eyok par uje ye yukw̄iya erze ĩrmo oso uje ot̄ir urhuta bahluta ehēt nehe. <sup>33</sup>Pish̄ibo watsaklo, heke titim olak. Uje akishlo olak owich par uje aaklo ich tyenij anemloye par uje nos aaklo. <sup>34</sup>Kimiji yeēk ch̄ihi olak ehēt uje ir iyuwo s̄ēhi ich tyenij taak̄ihi lahuch wap. Heke uje akishlo olak owich ich ye uhulo Porrosht depȳr olak. Uje tekirihi olak nehe hn titim olak nos wir kuche yewo uje de asa olak hut̄ita uje asimlo yokni par uje atimlo yok.

**Porrosht Ich̄ibich ishim ōr eyuwo par oshiyok̄r ir ibiyo.**

**12** <sup>1</sup>Pish̄ibo watsaklo, ele ahle sehe titim olak uje Porrosht Ich̄ibich ishim̄ihi Porrosht aabo ōr eyuwo o ishim̄ihi ōr ukurbo par uje oshiyok̄r ir ibiyo. Ye tahm̄urpe uje ye erahalope. <sup>2</sup>Erahalo uje ehn yahpaa olak Porrosht aabo petikni ich oso ode uje oshuu eeych̄ahalo erze kojano po uje ye dilehetpe. <sup>3</sup>Heke ele ahle sehe tuu erahalo uje Porrosht Ich̄ibich yelij duhu yeēk laj̄ir Jesús ikiyo. N̄ihyok uje yeēk pwele tatim yewo im: —Jesús wichi uu yok Irh̄ich— uje ye Porrosht Ich̄ibich duhu tata duhu ilorz.

<sup>4</sup>Sehe titim olak. Porrosht nos ishim̄ihi eyok eyuwo o eyok ukurbo shuu kin̄āho kin̄āho par shuu eyok d̄ituwo par uje yiyok̄r ir ibiyo per nos wir erze eyuwo hn ukurbo shi tāra Porrosht Ich̄ibich. <sup>5</sup>Porrosht Ich̄ibich shuu eyok yewo omasaha par Porrosht aabo ōr bahluo per ōr ibiyo kin̄āho kin̄āho, per shish wir eyok Irh̄ich ir ibiyo. <sup>6</sup>Obiyo ich kihniya uje ich kin̄āho kin̄āho uje sehe duhu yiyok̄r per Porrosht shish sohmira. Ch̄ib̄ite eyok aho uje sehe duhu nos yiyok̄r. <sup>7</sup>Ich imeheeych uje Porrosht Ich̄ibich de eyok aho pork shuu eyok d̄ituwo par yakash̄imloye. <sup>8</sup>Porrosht Ich̄ibich shuu Porrosht aap nohm̄ira eykdeyo par ch̄iraha Porrosht ahwoso hn tatim ōr, hn shuu yet ch̄iraha sanim̄ir̄aha lahwoso, per shi Porrosht Ich̄ibich wichi uje shuu ōr d̄ituwo. <sup>9</sup>Ish̄im yet eyuwo par uje ma ye duhu lotiis Porrosht. Ese ōr eyuwo shi tāra Porrosht Ich̄ibich, hn ishim̄ yet ukurbo par uje shuu chukuta erze uje ōr permo per shi tāra Porrosht Ich̄ibich. <sup>10</sup>Ish̄im yet ukurbo par uje shuu shiyok̄r erze kuche uje ye latik pwele shiyok̄r, hn ishim̄ yet eyuwo par uje shuu d̄itik sanim̄ir̄aha erze ahwoso uje Porrosht tatim ire, hn ishim̄ yet eyuwo par uje shuu

chiraha kuche kimiji tāra Porrosht Ichibich o kimiji tāra ichibich kinēhet. Porrosht Ichibich ishim yet eyuwo par uje seēt ahwoso kināho, hn ishim yet eyuwo par uje shuu chiraha erze ahwoso kināho uje yet seēt hn shuu cheeshi tatim Porrosht aabo yewo. <sup>11</sup>Nos wir erze ukurbo shi tāra Porrosht Ichibich. Ishim oso kal nohmir nohmir uje ire sehe dosim ōr.

**Porrosht aabo wir Cristo ir ikiyo.**

<sup>12</sup>Sehe titim olak. Hnakirbich shi sohmira per ikiyo ich kihniya per shish ire sohmira. Nos wir Porrosht aabo wir Cristo ir ikiyo uje shi sohmira. <sup>13</sup>Porrosht Ichibich shi sohmira. Wichi de eyok aho uje eyok Porrosht aabo hn shuu itso uje nos tohirm eyok par uje shuu eyok Cristo ir ikiyo. Kimiji eyok israel oso o kimiji eyok dihipo kināho, o kimiji eyok ōr yilo o kimiji ye eyok ōr yilope per Porrosht Ichibich nos de eyok aho uje eyok Porrosht aabo. <sup>14</sup>Eyok ikiyo ich kihniya, ye shi sohmirape. <sup>15</sup>Kimiji eyok yeēk pota ese yet ir ibiyo ich shi itso uje asa Cristo ir hnitita tata im: —Ye yok Cristo hmatape heke ye yok Cristo ir ikiyope— per wichi shish Cristo ir ikiyo. <sup>16</sup>Kimiji Cristo ir ārza tata im: —Ye yok Cristo onta eyhitape heke ye yok Cristo ir ikiyope— per wichi shish ir ikiyo. <sup>17</sup>Kimiji Cristo ir ikiyo shi onta eyhita zich duhu inaapo par uje chunt kuche? Kimiji Cristo ir ikiyo shi ārza ich ye ire pwele uje chowihir latik. <sup>18</sup>Porrosht wichi uje chibite eyok ikiyo erze po nohmir nohmir ir owich uje ire sahmūr. <sup>19</sup>Kimiji eyok shi ārza sohmira ich nihyok eyok ikiyo yewo. <sup>20</sup>Ich ūru uje hnakirbich ir ikiyo ich kihniya per shi ire sohmira. <sup>21</sup>Titeēta kuchit yet. Cristo ir onta eyhita ye pwelpe tatim Cristo ir hmata im: —Ye yok nesit owape.— Cristo ir huta itspo ye pwele uje tatim ir hnitita im: —Ye yok nesit owape.— <sup>22</sup>Pork erze po uje de eyok ikiyo uje shi itso uje ye ukūrbirsh per ich shish eyok nesita. <sup>23</sup>Eyok ikiyo uje yērij om ich yuhu ma om. Eyok ikiyo de uje ye ompe par oso omo ich yakis yonāha eyok ishuwo, <sup>24</sup>per eyok ikiyo uje oso omo ich ye yakispe. Porrosht wichi uje nos shiyokōr eyok ikiyo shuu yibey eyok ikiyo uje ye ompe yowa oso <sup>25</sup>par uje ye dehek ire per shish nos takashimye. <sup>26</sup>Kimiji eyok ikiyo sohmet doso ich nos yuuna uje doso, hn kimiji yeēk diyuhu lahwoso omoho ekiyo pikaap ich nos wir ikiyo ich ayla.

<sup>27</sup>Heke titim olak. Olak Cristo ir ikiyo hn olak nohmir nohmir akishlo ire. <sup>28</sup>Porrosht nos chiihla eyok par uje yiyokōr ir ibiyo per nos eyok ibiyo kināho. Wap chiihla par ir apóstole. Wir uje otsanimirāha ir ahwoso otatim erze uje ye ōr Porrosht aabo. Chiihla profeta toy. Wir uje otsanimirāha Porrosht ahwoso iglesya ehēt. Hn chiihla yewo par uje oshiyokōrāha ōr Porrosht ahwoso. Chiihla yewo ma nēr par uje oshiyokōr kuche uje ye latik pwele shiyokōr, hn chiihla yewo toy par uje ochukuta erze uje ōr permo. Chiihla yewo par uje otakashim oso yewo, hn chiihla yewo par uje otakashim Porrosht aabo ōr bahuwo ōr ibiyo par uje nos

tokole om, hn chiihla yewo par uje otseēt ahwoso kināho. <sup>29</sup>Shi chiihla nohmiramamo par ir apóstole, hn shi chiihla nohmiramamo par ir profeta, hn shi chiihla nohmiramamo par oshiyokorāha ōr Porrosht ahwoso, hn shi chiihla nohmiramamo par oshiyokōr kuche uje ye latik pwele shiyokōr. <sup>30</sup>Shi chiihla nohmiramamo par ochukuta erze uje ōr permo, hn shi chiihla nohmiramamo par uje otseēt ahwoso kināho, hn shi chiihla nohmiramamo par ochiraha erze ahwoso kināho par uje oshuu cheeshi otatim yewo. <sup>31</sup>Titim olak wapike erze obiyo uje ich ma ihīrtso uje sehe tuu olak ma ahmūrlo hn ahakōrlo, per de uje ich ma om uje tyenij titim olak nehe.

### Porrosht aabo tyenij otsahmūrje.

**13** <sup>1</sup>Titim olak. Kimiji teēt ahwoso kināho uje oso otseētīhi lekitiyo o kimiji teēt anjele ōr ahwoso per ye tahmūr yewo ich ye yok jukur. Ich shi yok itso fyerit ihyokōrt uje yeēk shuu, hn shi yok itso pīrete uje fyero uje oshuu ochīra yēr ich ihyokōrak dich. <sup>2</sup>Kimiji yok profetya uje tanimīrāha Porrosht ahwoso iglesya ehēt, o kimiji nos tikiraha erze kuche uje yewo ye odirehepe, o kimiji peyuwo deyo, nos tikiraha kuche, o kimiji yelij tokotiis Porrosht heke yok pwele tuu ese kojach dich sihnok lalerc, per kimiji ye tahmūr oso yewo ich ye yok jukur. <sup>3</sup>Kimiji tokosimihi losuhlaabo nos wir pishujāro, o kimiji tokosim yok ōr par uje otsēru yok per kimiji ye tahmūr oso yewo ich ye terz latik.

<sup>4</sup>Sehe titim olak. Kimiji ahmūr yewo ich enta ōr hn uhu eluu oomihi ōr hn ye abīta ōr kuche. Kimiji ahmūr yewo ich ye owa narim owa. <sup>5</sup>Uje ahmūr yewo ich ye uhu owa dich. Uje ahmūr yewo ich ye ahakōr uje shi owa ahmūr, hn ye aas elo shichish, hn ye ehmerīhi ehēt erze kuche mīhnūwo uje yet shiyokōrni. <sup>6</sup>Kimiji ahmūr yewo ich ye uhu owa ayla uje kuche mīhnūwo tīr ōr. Shi tyenij owa ayla toy uje erze om tīr ōr. <sup>7</sup>Kimiji ahmūr yewo per oshiyokōr mīhnikīhi owa ich ye eyuhu ahwoso mīhnuwōho ōr. Uje ahmūr yewo ich shish ye otiis ōr uje otatim owa. Uje ahmūr yewo ich shish uhu eyuwo tisīr uje deeych yet nehe hn wir oshiyokōr uje ich om, hn shish nos owa ewenta erze kuche uje ōr ire oshiyokōr.

<sup>8</sup>Porrosht chibīte uje shish tyenij ahmūr yewo. Ye uhurtzikish, per uje yeēk sanimīrāha Porrosht ahwosoho iglesya ehēt, hn uje yeēk seēt ahwoso kināho, hn uje yet shiyokorāha yewo wir tyenij uhurish nehe. <sup>9</sup>Ele ahle yērij yīraha, hn yērij yanimīrāha ir ahwoso. <sup>10</sup>Uje terīhi ese ishīrīt nehe uje nos yīraha erze kuche ich nīhyok kuche uje yērij odīraha. <sup>11</sup>Uje ehn yok pikīhninaapni uje tiipuhut hn uje tuu peyuwo tisīr ich shi yok itso pikīhnino yewo, per uje ich yok hnakīrapni ich nos tokoym erze pikīhnino ōr iluu. <sup>12</sup>Ele ahle yērij yīraha Porrosht iluu shi itso uje yeychim eyok ichibichīhi pejta ehēt waa je waresh hn yērij yomo eyok ichibich. Per je deeych yet nehe ich yomlo pishye. Ele ahle yērij tikiraha

per je deeych yet nehe ich nos tikiraha shi itso uje Porrosht chiraha yok. <sup>13</sup>Kuche de tre uje yelij nihna ire. Webich osht uje ye yotiislo Porrosht hn yet uje shish yiyemlo uje Porrosht tyenij ishim eyok uje de ire ahir hn yetpo uje shish yahmürlo yewo per ese uje ich ma ihirt wichi uje yahmürloye.

**Waa iluuta uje otseēt ahwoso kināho.**

**14** <sup>1</sup>Sehe titim olak par uje shish enaha olak par uje ahmürloye, hn shish apurlo Porrosht par uje ishim olak erze eyuwo hn ukurbo uje tāra ire. Ese uje ich ma om wichi par sanimirāha Porrosht ahwoso. <sup>2</sup>Ese uje seēt ahwoso kināho ye keytkēr osope, shi keytkēr Porrosht heke nihyok uje yeēk chiraha uje wichi tata. Porrosht Ichibich shuu chiilehet tatim Porrosht erze kuche uje yewo ye odirehepe. <sup>3</sup>Per ese uje shiyokorāha ör Porrosht ahwoso ich shuu erze yewo ma ye olotiis Porrosht, hn shuu ör duurapo, hn shuu ör aho kiis. <sup>4</sup>Ese uje seēt ahwoso kināho shi shuu ire ma ye lotiis Porrosht, per ese uje sanimirāha Porrosht ahwoso tatim erze ir aabo par uje shuu ma ye olotiis Porrosht. <sup>5</sup>Titim olak. Sehe tuu nos erahalo eētlo ahwoso kināho per ma tahmür uje animirāhalo Porrosht ahwoso. Yeēk uje sanimirāha Porrosht ahwoso ich ma om je yeēk uje seēt ahwoso kināho, per ich ompo kimiji yeēk chihī uje shuu erze ahwoso kināho cheeshi tatim olak par uje shuu olak ma ye otiislo Porrosht.

<sup>6</sup>Pishibo watsaklo, kimiji tekirihi olak hn shi teēt ahwoso kināho uje ye erahalope ich ye takashim olakpe. Per kimiji titim olak erze uje Porrosht shuu tikiraha ich takashim olak, o kimiji titim olak uje yok tikiraha ich takashim olak, o kimiji tanimirāha Porrosht ahwoso ich takashim olak o kimiji tiyokorāha olak ich takashim olak. <sup>7</sup>Erze kuche uje oshuu hn otsobita par oteeychi kimiji flawta o kimiji arpa, kimiji ye ihyokört tokole om ich nihyok uje yeēk chiraha uje wichi shuu seēt. <sup>8</sup>Kimiji ohyerptosht dobita kornetit hn ye diraha dobitape ich nihyok uje yewo ochiraha heke ye onishii irpe par uje oteye. <sup>9</sup>Shi itso uje tokolihi olak. Kimiji eētlo ahwoso kināha uje ye odiraha uje tata ich shi itso uje shi eylo olak uhut. <sup>10</sup>Oso ör ahwoso kināho ich kihniya de nāhu irmo uje otseēt hn ich ūru uje nos tata kuche par uje ochiraha. <sup>11</sup>Per kimiji ye tikiraha erze ahwoso uje tata, tibite uje wichi dihip kināha hn ire chibite uje yok dihip kināha. <sup>12</sup>Olak shi sehe eētlo ahwoso kināho par uhulo imeheeych uje Porrosht Ichibich de olak aho, per ich ma om enahalo olak par uje uhulo Porrosht aabo ma ye olotiis irpe.

<sup>13</sup>Heke yeēk uje seēt ahwoso kināho ich tyenij orar sapur Porrosht par uje pwele shuu erze ahwoso cheeshi tatim ör. <sup>14</sup>Kimiji teēt ahwoso kināho uje yok orar ich pichibich wichi uje orar per ye tikiraha uje tiita. <sup>15</sup>¿Tiyokör latikpo? Tyenij tuu pichibich orar seēt ahwoso kināho hn

tyenij tuu peyuwo tisĩr hn yok orar toy par uje nos ochiraha uje tiita. Tyenij tuu pichibich teechi seēt ahwoso kināho hn tuu peyuwo tisĩr hn teechi toy. <sup>16</sup>Kimiji olak yeēk ye niyokōr itso yok, per shi seēt ahwoso kināho hn teeychāha Porrosht hn yeēk uje tekirihĩ iglesya ehēt tēr hn ye diraha uje tata. Heke ye ire pwelpe uje tata im: —Yehe wichi— pork ye diraha uje tata. <sup>17</sup>Ich om uje seēt ahwoso kināho uje nina Porrosht per ye takashimpe ese yet uje de ahir. <sup>18</sup>Tikinship Porrosht uje ma teēt ahwoso kināho je nos wir olak uje eētlo ahwoso kināho, <sup>19</sup>per uje yok de asa iglesya ehēt ich ma tahmūr tiyokorāha ōr titim ōr tuu pahwoso sinko uje ochiraha je uje teēt ahwoso kināho dye mil uje ye odirehepe.

<sup>20</sup>Pishibo watsaklo, moymlo uje uhu olak eyuwo itso pikihnino. Shi tyenij uhu olak ilo pikihnino ijaabo uje ye odiraha oniyokōr uje mihnikpe hn uhu olak eyuwo tisĩr ilo hnakirbo. <sup>21</sup>Porrosht ahwoso tata shuu itsorz im: —Eyok frhĩch sole: “Tuu dihipo kināho uje otseēt lahwoso ohno ofĩr erze israel oso par otsepyēr ōr per shish ye onahmūr otēr yokpe.”— <sup>22</sup>Heke ich imeheeych uje erze ahwoso kināho uje otseēt wir par yara par erze uje otsotiis ire, ye par erzepe uje ye olotiis irpe. Per erze uje otsanimirāha Porrosht ahwoso wir ye balpe par erze uje otsotiis Porrosht. Wir par yara par erze uje ye olotiis Porroshtpe pork otsahmūr. <sup>23</sup>Heke kimiji nos Porrosht aabo otakasho lawich hn oneēt ahwoso kināho kimiji yewo omasaha ōr ehēt uje ye Porrosht aabope hn yelij onōya ōr ¿je otata uje ōr totihlo? Ēhe, otata uje ōr totihlo. <sup>24</sup>Per kimiji nos animirāhalo Porrosht ahwoso hn yeēk masaha olak ehēt uje ye Porrosht aappe uje yelij nōya olak hn chunt uje athilo Porrosht ahwoso ich chuuna uje ir iluu mihnũ. <sup>25</sup>Erze kuche mihnũwo uje shiyokōrni ich nos chibite orhōta heke icha dete hnimoho Porrosht ikich hn teeychāha Porrosht hn tatim ōr uje ich ūrpa uje Porrosht de ōr aho.

### **Waa iluuta uje otakasho lawichihĩ iglesya ehēt.**

<sup>26</sup>Pishibo watsaklo, sehe titim olak. Uje akishlo olak owich ich ode uje oteeychi otseēt imno hn ode uje oshiyokorāha ōr hn ode uje otata uje Porrosht shiyokōr omihĩ ōr hn ode uje otseēt ahwoso kināho hn ode uje ochiraha erze ahwoso kināho hn oshuu cheeshi otatim ōr. Nos wir erze uje otata kuche iglesya ehēt wir shi par oshuu Porrosht aabo ma ye olotiis ire. <sup>27</sup>Uje sehe eētlo ahwoso kināho ich shi uhu olak osiyer o kimiji olak tre hn ye aluwelo. Shi uhu olak nohmĩr nohmĩr uje eētlo per tyenij yet de uje chiraha ahwoso kināha hn shuu cheeshi tatim ōr. <sup>28</sup>Per kimiji nĩhyok uje chiraha shuu erze ahwoso kināho cheeshi iglesya ehēt hn tatim ōr ich ye eētlo. Per kimiji sehe eēt ich shi par owa hn Porrosht per ich eetihĩ ahuch ehēt, ye iglesya ehēte. <sup>29</sup>Wir ōr itspo uje otsanimirāha Porrosht ahwoso, kimiji ōr osiyer o kimiji ōr tre uje otsanimirāha Porrosht ahwoso hn nos wir Porrosht aabo yewo tyenij oshuu deyuwo tisĩr uje otēr kimiji

ũru o kimiji ye ũrpe. <sup>30</sup>Kimiji yeẽk chihi iglesya ehethn Porrosht tatim ire kuchẽrk hn ese yet uje sanimirãha Porrosht ahwoso tyenij ishimi ire par uje chiilehet hn tẽr uje wichi tata. <sup>31</sup>Heke nos olak nohmĩr nohmĩr pwele uje animirãhalo Porrosht ahwoso par uje uhulo Porrosht aabo ma odĩraha kuche hn oduurapo. <sup>32</sup>Uje yeẽk sehe nanimirãha Porrosht ahwoso tatim õr uje Porrosht tatim ire ich tyenij iyem uje tok ire par uje chiilehet. <sup>33</sup>Porrosht ye nahmũrpe uje nos õr ahwoso chimirihi ye luke. Sahnũr uje nos õr aho kũisihiye. Titim olak. Itso uje Porrosht aabo oshiyokorãha orĩhi iglesya aho lekitiyo <sup>34</sup>ich timcher tyenij ye odiilehetihi iglesya ehethn timcharrza tyenij shiyokõr uje ir abich tatim ire pork Porrosht ahwoso tata shuu itsorz. <sup>35</sup>Uje kuchẽrk chihi uje sehe dĩaraha ich tyenij tatim dabich uje ode dahuch pork ye ompe uje timcharrza chiilehetihi iglesya ehethn. <sup>36</sup>¿Je ye ahmũrlo uje titim olakike? Ye shi olak uje Porrosht ishimi olak lahwasni, hn ye shi par olak erze Porrosht ahwoso.

<sup>37</sup>Kimiji yeẽk dibite uje ire profeta uje sanimirãha Porrosht ahwoso o kimiji dibite uje shish shiyokõr uje Porrosht ichibich tata, wichi tyenij tata uje erze ahwoso uje tichew tãra eyok Irhĩch. <sup>38</sup>Kimiji ye tata uje tãra Porrosht ich ye ěrlo ire. <sup>39</sup>Pishĩbo watsaklo, heke titim olak. Tyenij ekwilo par uje animirãhalo Porrosht ahwoso, hn ye ahĩrmlõ õr uje otseẽt ahwoso kinãho. <sup>40</sup>Uje nos akishlo olak owichihi iglesya ehethn ich tyenij ye uhu olak ahwoso nimirihi ye luke.

### Uje Cristo ikponi ich serz.

**15** <sup>1</sup>Pishĩbo watsaklo, titim olak. Sehe tuu olak eyucha erze ahwoso uje tiyokorãha olakni uje Jesũs ishi olak hnitewihi Porrosht ahĩrkite. Uje entloni erze ahwoso ich ahmũrlo hn ye moymlo Porroshtpe. <sup>2</sup>Erze Porrosht ahwoso uje titim olakni wir uje shuu olak owich de Porrosht ahĩr per kimiji moymlo pork olak koswãha uje ebĩtiloni uje ye otiislo Cristo heke ich ye jukur. <sup>3</sup>Titim olak wapni erze uje olak nesita entlo. Titim olak uje Cristo tatim yok uje tooho krus eeychkite par ishi eyok hnitewihi Porrosht ahĩr shi itso uje Porrosht ahwoso tata. <sup>4</sup>Ochihitsĩm Jesũs per daalo tre hn Porrosht shuu ikpo shi itso uje Porrosht ahwoso tata. <sup>5</sup>Wap tokolihi Pedro ikich depwe hn nos tokolihi wir apõstole yewo õr ikich toy. <sup>6</sup>Deeych yet hn Jesũs tokolihi Porrosht aabo õr ikich toy uje oyuwe kinyento. Wir ich okihniya uje yesh õr ika hn ich nohmĩramo wishi otoy. <sup>7</sup>Deeych yet hn tokolihi Santiago ikich toy, hn deeych yet ich nos tokolihi erze ir apõstole õr ikich toy. <sup>8</sup>Ich uhurc ich tokolihi pikich heke shi yok itso pikihnt uje iyuwe deshĩryo hn ye shurhãpe. <sup>9</sup>Per yok ye yok dichpe je erze apõstole yewo. Ich ye ompe uje otĩbii yok otsii apõstol pork tiyokõr mihnĩkĩhi Porrosht aaboni. <sup>10</sup>Porrosht wichi uje sosir yok hn shuu yok ir apõstol. Ye tokoym ir



ibiyope per ich tınaha yok uje tiyokōr ir ibiyo je erze apóstole yewo. Ye shi yok uje tiyokōr erze obiyope per Porrosht wichi uje sosir yok hn takashim yok. <sup>11</sup>Ich ye latikish par yok kimiji titim olak o kimiji erze apóstole yewo otatim olak. Per ich om uje oyyikorāha olak Porrosht ahwoso hn ye otiislo.

### Nos topo tyenij ōr ikpo nehe.

<sup>12</sup>Oyanimirāha oyitim olakni uje Cristo ikponi tokolihi erze topo ōr ahir. ¿Inaapo heke olak eheth yewo ode uje otata uje erze topo ye ōr ikpope? <sup>13</sup>Kimiji erze topo ye ōr ikpo nehe ich ye Cristo ikpo petikni, <sup>14</sup>hn kimiji ye wichi ikponi ich erze ahwoso uje oyyikorāha olak ich ye jukur, hn ye jukur uje ye otiislo uje Cristo ishi olak hñitew. <sup>15</sup>Kimiji Cristo ye ikpo ilorzni ich shi oyiita ōryok ukushiī, pork oyitim olak uje Porrosht shuu Cristo ikponi, per kimiji Porrosht ye duhu ikponi ich niñyok uje ōr ikpo nehe. <sup>16</sup>Kimiji erze topo ye ōr ikpo nehe ich Cristo ye ikpo petikni. <sup>17</sup>Kimiji ye Cristo ikponi ich ye jukur uje ye yotiislo ire heke yesh eyok hñitew de Porrosht ahir. <sup>18</sup>Kimiji ye Cristo ikponi ich nos wir erze uje ye olotiis Cristope uje otoni ich ode urhuta bahluta eheth. <sup>19</sup>Kimiji ye eyok ikpo nehe ich ye jukur uje yiyemlo erze uje ich om uje Porrosht tata. Heke ich eyok ma losuhlaabo je erze oso yewo per ich ye ūrpe.

<sup>20</sup>Ich ūru uje Cristo ikponi hn tokolihi erze topo ōr ahir. Wichi webich os uje ikponi hn erze yewo tyenij oyehe nēr nehe uje otoni. <sup>21</sup>Hnakirbich nohmet uje iich otsiī Adán nos shuu oso otoy. Per hnakirbich yet de uje shuu oso ōr ikpo nehe. <sup>22</sup>Nos wir eyoklo yārlo Adán heke tyenij nos yitilo, per nos wir uje ye olotiis Cristo ich omasaha par Porrosht aabo hn ōr ikirīt ahle de nehe. <sup>23</sup>Ye nos ōr ikpe yehe wichi deeych nohmet per nos ōr owilo de uje ōr ikpo nehe. Cristo wichi uje wapni hn ikpo, hn uje cheeshpo nehe ich nos wir eyok uje Cristo wichi uu eyok irhīch eyok ikpo. <sup>24</sup>Uje terihi ĩrmo uhurc nehe ich Cristo nos sihna erze uje ōr bahlwo hn nos wir erze uje ōr ukurbosh. Ishim ir Deych Porrosht nos wir Porrosht aabo. <sup>25</sup>Cristo tyenij masaha par rey nehech nos serz namāho. <sup>26</sup>Ese ir imehēt uhurzosh uje Cristo tyenij sihna nehe wichi uje shuu oso otoy. <sup>27</sup>Porrosht nos chibite oso hn nos chibite kuche Cristo ir hme. Uje Porrosht tata uje nos chibite erze kuche Cristo ir hme ich imeheeych uje ye dibite ire Cristo hmepe. <sup>28</sup>Ich uhurc hn Cristo nos serz wir kuche hn nos de ir hme hn wichi de Porrosht ir hme. Porrosht wichi uje nos chibite erze kuche Cristo ir hme. Heke ich uhurc hn Porrosht ich ma dich.

<sup>29</sup>Kimiji ye erze topo ōr ikpo nehe ¿ich inaapo heke otohirm erze yewo par erze Porrosht aabo uje otoni hn ye otohirm ōr petikni? Kimiji olotiis uje topo ōr ikpo nehe ¿inaapo heke otohirm yet uje yesh ika par ese uje toni? <sup>30</sup>Sehe titim olak kuchit yet. Kimiji ye topo ōr ikpo nehe ich ye

jukur uje oyanimirāha Porrosht ahwoso hn oyuhu yewo otsitak ōryok nehech sehe oduhu ōryok oduhu oyiti. <sup>31</sup>Pishibo watsaklo, erahalo uje ich ūru uje ma tahmūr uje ye otiislo eyok Irhīch Jesucristo. Ich ūru toy uje ode uje kal daalo sehe oduhu yok oduhu tikiti. <sup>32</sup>Uje yok dechi dit Efeso tanimirāha Porrosht ahwosni ich itso uje takitsikir erze hnakirbo uje shi ōr itso erze loshipo uje ich ehrito. Kimiji ye erze topo ōr ikpo nehe ¿inaapo heke titim ōr tuu itsorz? Kimiji ye ōr ikpo nehe ich ma om tiyokōr uje yewo otata otsii: —Oyuko oyaak hn oyoho pork deeych yet nehe hn oyiti.— <sup>33</sup>Ye uhulo onehnyēr olak. Yet de uje tatni im: —Kimiji yeēk ir iluu om hn iya erze uje ōr iluu mihñū ich oshuu wichi ir iluu mihñū toy.— <sup>34</sup>Uhu olak eyuwo tisir erze uje ich om hn ye ahakōrlopo erze uje ich mihñūwo. Olak yewo ode uje ye odiraha Porrosht ir iluupe. Titim olak tuu itsorz par uje tuu apooklo uje ode olak eh et hn ye atimlo ōr.

**Uje Porrosht aabo ikpo nehe ich ōr ikiyo itso Cristo ir ikiyo.**

<sup>35</sup>Sehe titim olak uje olak yewo sehe odiraha uje ¿keshi oduhu inaapo par topo ōr ikpo nehe? ¿Keshi ōr ikiyo ilo latikpo uje ōr ikpo nehe? <sup>36</sup>Owa uje uhu eyuwo tisir itsorz ich owa totihla. ¿Inaapo heke ye uhu eyuwo tisirpe uje ekwēr erze jōro eyhi ich shi itso uje toy uje ahatsim hn erze jōro tokole? <sup>37</sup>Uje ekwēr kuchēr ich shi ir eyhi wir uje ekwēr kimiji trigo ir eyhi o kimiji jōro kināho ir eyhi per jōro tokole. <sup>38</sup>Porrosht wichi uje shuu erze eyhi tokole shi yehe wate pohorrza uje ire sahmūr. Kal eyhi shi yehe wate pohorrza tokole itso uje ire sahmūr. <sup>39</sup>Nos wir kuche ēro ye ilyepe. Hnakirbich ir ēro kināho, hn loshipo ir ēro kināho, hn chipirme ir ēro kināho, hn loshiyo ir ēro kināho. <sup>40</sup>Shi itso erze anjele wir ōr ikiyo kināho, ye ilo oso ōr ikiyope. Erze kuche uje ich ihirtso uje de wahacha poōrc ich kināho hn erze kuche uje ich ihirtso uje de nāhu irmo ich kināho toy. <sup>41</sup>Uu deeych ir yokōrt wichi kināha, ye ilo ese shekurko ir yokōrtpe. Wichi kināha hn porrzeebe ir yokōrt kināho toy. Nos wir porrzeebe ir yokōrt kināha kināha, ye ilyērpe. <sup>42</sup>Erze uje otoni uje ōr ikpo nehe ich ōr kināho toy. Erze ōr ikiyo uje ochihitsim ich nos taata hn uje ōr ikpo nehe ich ye ōr ikiyo taatpe. <sup>43</sup>Erze uje otoy ich tyenij ochihitsim ōr pork ōr ikiyo taata. Uje ōr ikpo nehe ich ōr ikiyo ihirtso. Uje ochihitsim ōr ich ye ōr ukūrbirsh, per uje ōr ikpo nehe ich ōr ukurbo de. <sup>44</sup>Uje otoy hn ochihitsim ōr ich shi ōr ikiyo itso ahñūwo oso uje ode nāhu irmo, per uje ōr ikpo nehe ich ye ōr ikiyo shi par irmōpe. Ōr ikiyo de uje sihna ire hn ōr ikiyo de uje yelij nihna ir. <sup>45</sup>Porrosht ahwoso tata shuu itsorz im: —Adán wichi uu hnakirbich webich osht uje Porrosht shiyokōrkite hn ishim ir ikirīt shi par nāhu irmo.— Hnakirbich yet de uje itso Adán. Wichi ishim oso ōr ikirīt uje yelij nihna ire. Wichi Cristo. <sup>46</sup>Wap ye oso ōr ikirīt chihipe uje ich om

par otĩr poõrc. Shi oso õr ikirĩt de nãhu ĩrmo. Õr ikirĩt uje ich om par tĩr poõrc iyehe nẽr. <sup>47</sup>Ese hnakirbich webich osht wichi ĩrmo os. Porrosht shiyokõrkite chĩra hnimich. Ese hnakirbich yet uje iyehe nẽr wichi tãra poõrc. <sup>48</sup>Kal oso ich õr ikiyo itso Adán. Porrosht shiyokõrkite chĩra hnimich ukult, per Porrosht aabo tyenij otĩr poõrc nehe. Je deeych yet nehe ich õr ikiyo itso Cristo ir ikiyo uje tãra poõrc. <sup>49</sup>Ele ahle shi eyok ikiyo itso Adán ir ikiyo uje Porrosht shiyokõrkite chĩra hnimich ukult. Je deeych yet nehe ich eyok ikiyo itso Cristo ir ikiyo uje tãra poõrc.

<sup>50</sup>Pishibo watsaklo, sehe titim olak. Eyok uje eyok de nãhu ĩrmo eyok ěro hn eyok armista ye pwelpe uje tĩr Porrosht ahir wahacha poõrc. Eyok ikiyo tyenij taata nehe heke erze ikiyo ye pwelpe tĩr poõrc par uje serz erze uje yelij taata. <sup>51</sup>Titim olak kuchit yet uje ye oso odirehepe. Ye nos yitilo petik nehe per Porrosht tyenij nos shuu eyok ikiyo kinãho. <sup>52</sup>Uje yunt Porrosht ir trompeta uje yeẽk sobita uje shuu iyehe uje sobita ich nos shuu eyok kinãho shichish shuu itsorz. Shi itso uje eyok ile ěperak shichish ich Porrosht shuu laabo õr ikpo shichish uje otoni hn ich ye otopope, shi Porrosht shuu eyok ikiyo ahlo toy. <sup>53</sup>Eyok ikiyo sihna ire saraãshi per deeych yet nehe hn Porrosht ishim eyok ikiyo ahlo uje ye nihna irpe, heke ye yitpe. Shish tyenij eyok ika. <sup>54</sup>Uje eyok ikiyo tokole uje ye taatpe hn eyok ikirĩt tokole uje ye tope itsorz ich Porrosht ir ahwoso yakaha uje ir aabo otata otsii:

—Eyok yerz pork ich ye yitpe. <sup>55</sup>Ese uje shuu oso otoy ye derzpe, hn nihyok ir ukurbo par uje shuu otoyto itso uje ich ye wosĩrsh.—

<sup>56</sup>Ese uje ich wos deyo uje shuu otoy wichi uje oshiyokõr uje ich mihnuwo. Ir ukurbo wichi Porrosht ir ley pork shuu yiraha uje yiyokõr uje ich mihnuwo par uje sepyer eyok. <sup>57</sup>Tikinship Porrosht pork eyok ĩrhĩch Jesucristo wichi uje ishi eyok hnitewkite heke shuu yerz. <sup>58</sup>Pishibo watsaklo, heke titim olak. Ye uhu olak koswãha eyok ĩrhĩch. Shish ahakõrlo ir ibiyo pork erahalo uje erze eyok ĩrhĩch ir ibiyo uje ahakõrlo wir shish tokole uje bale.

**Pablo shuu ochish hnote yer par Porrosht aabo uje ode Jerusalén.**

**16** <sup>1</sup>Sehe titim olak par uje eeshilo hnote yer par asimlo eyok leshibo uje õr nesita. Titim olak par uje ahakõrlo uhulo olak itso uje titim erze Porrosht aaboni uje ode hnimich Galacia par uje oshiyokõr. <sup>2</sup>Uje kal terihi domingo ich eeshilo hnote yer par uje ehmerlo. Uje olak yewo otserz hnote kihniya ich om oshim kihniya per erze uje otserz arhebe ich om oshim pikaap. Heke uje takaachĩhi olak ahir nehe ich ye nesit eeshilo yerpe. <sup>3</sup>Uje takaachĩhi olak ahir nehe ich aahlilo hnakirbo par uje ohnoy erze hnote uje eeshilo yer par oshim erze Porrosht aabo uje ode Jerusalén. Erze hnakirbo uje ohnoy erze hnote uje eeshilo yerhna par oshim õr ich tichew hute hn tokosim õr par uje ochiraha yeniipo õr. <sup>4</sup>Kimiji om uje takaha titir Jerusalén ich wir oya yok.

**Owich uje Pablo tyenij t̄ir nehe.**

<sup>5</sup>Sehe titim olak uje wap sehe tekirihi erze Porrosht aabo uje odechi hnimich Macedonia nehech takaach̄ihi olak ahir. <sup>6</sup>Yibe kimiji tiyakaha olak ahir tuu daalo arhaabo o kimiji tiyakaha olak ahir nehech hmamo ish̄ir̄it uhurc. Heke olak pwele akashimlo yok uje takaha keshi iraāpo uje tyenij t̄ir̄. <sup>7</sup>Ye tahm̄urpe uje tekirihi olak hn tikitokolihi olak ahir shichish per sehe tiyakaha olak ahir tuu daalo kihniya kimiji eyok Irh̄ich nahm̄ur. <sup>8</sup>Sehe tiyakaha d̄it Efeso nehech ter̄ihi ese ōr ahamich uje iich otsii Pentecostés. <sup>9</sup>Porrosht shuu oso okihniya uje otsahm̄ur tiyokorāha ōr Porrosht ahwoso, per ich okihniya uje otsitak hn sehe onontew.

<sup>10</sup>Uje Timoteo taach̄ihi olak ahir nehe ich tyenij uhulo wichi ehēt kiis pork wichi chishew eyok Irh̄ich ir ibiyo shi itso yok. <sup>11</sup>Ye ompe uje olak yeēk sitak wichi. Uje tokolihi olak ahir ich akashimlo ire hn uhulo ehēt kiis par uje tir̄ēt t̄ir yok pork yok hn Porrosht aabo yewo yesh oiyem ire.

<sup>12</sup>Shish titim eyok lesh̄ibich Apolos par uje tuu ūya erze Porrosht aabo yewo uje sehe odo ot̄ir olak per ele ahle ye nahm̄ur dope. Uje ter̄ihi ish̄ir̄it uje ich om par hno tekirihi olak ich hno.

**Yewo osh̄im ōr saludo.**

<sup>13</sup>Titim olak par uje abeylsh̄ip olak par uje n̄ihyok yeēk sehnȳer olak. Ye uhu olak koswāha Cristo. Shish ye otiislo ire hn ye atililo latik. <sup>14</sup>Nos wir kuche uje ahak̄orlo ich ahak̄orlo pork ahm̄urloye.

<sup>15</sup>Pish̄ibo watsaklo, olak erahalo uje Estéfnas hn nos wir ir iiso wir uje omasaha wapni par Porrosht aabo wahacha hnimich Acaya. Wir ochib̄ite ire par uje otakashim Porrosht aabo yewo. <sup>16</sup>Titim olak par uje ahak̄orlo uje erze oso otatim olak uje ōr itso Estéfnas h̄or hn nos wir erze yewo uje otakashim erze Porrosht aabo hn erze yewo uje ochishew ir ibiyo. <sup>17</sup>Sehe titim olak uje ich yok ayla uje Estéfnas hn Fortunato hn Acaico otaach̄ihi pah̄ir. Wir uje otakashim yok pork olak ich olak dukuhla hn ye olak pwele akashimlo yokpe.

<sup>18</sup>Ōr ire ich oshuu tukuurapo heke ich oshuu olak duurapo. Oso uje oshiyok̄or oshuu itsorz ich tyenij en̄ilo ōr.

<sup>19</sup>Nos wir Porrosht aabo uje ode ese hnimich Asia kal ōr wee ich osh̄im olak saludo. Aquila hn Prisca hn nos wir Porrosht aabo uje otakasho lawich̄ihi ir ihyuch osh̄im olak saludo pork ye otiislo eyok Irh̄ichpe. <sup>20</sup>Nos wir eyok lesh̄ibo uje ode lika pah̄ir osh̄im olak saludo. Olak tyenij shish etiloye.

<sup>21</sup>Yok Pablo. Tichew t̄ib̄ite ana hut̄ita uhurc uje tokosim olak saludo.

<sup>22</sup>Uje yeēk ch̄ihi hn ye nahm̄ur eyok Irh̄ichpe ich Porrosht tyenij saj̄ir wichi ikiyo. Sehe tuu eyok Irh̄ich deeshpo shichish.

<sup>23</sup>Sehe tuu eyok Irh̄ich Jesús dos̄ir olak.

<sup>24</sup>Nos wir olak ich tahm̄ur pishi olak pork erahalo Jesucristo.